

Hebreos

Goãtm̃ magu Goãtm̃ yare wererũ marire

¹ Iribojegue Goãtm̃ masare werenũgarũ. Īgu bajasuburi mari ñecũ sũmarãre iribojegue majarãre Īgu gamerire weremũripũ. Īgu yare weremũhtanirã mera erãre weremũripũ Īgu. Gajirãre Īgu dehyoa weremũripũ. Gajirãre Īgu bocatĩriro weremũripũ. Gajirãre quẽroque weremũripũ. Eropa weremũripũ Īgu mari acawererãre.

² Dohpaguere pehreburiũ coregã arĩrinũrire Īgu magure Īgu yare Īgu weredore obeocũ Īguũ marire wereami. Jesucristo Īgu Pagũ iidorero mera i yebare umaro sãre iidigu arĩmi. Īgu Pagũũ pehlerinũ arĩcũ arĩpehlerinũre opabure arĩũ Īgu.

³ Eropigu Īgu magũũ Īgu Pagũ õarire opagu arĩgu, Īgu turari mera marire ii ĩhmudi arĩmi. Eropigu yujuro mera Īgu Pagũ mera arĩgu, Īgu Pagũ arĩricũrire marire ĩhmudi arĩmi. Eropigu Īgu turari mera Īgu dorecũ i yeba, umaro sã eropa arĩniguia. Eropiro dederebeaa Īgu doreri mera. Eropigu mari ñero iirare Īgu coera pũhrũ Īgu Pagũ turatarigu diayerũ doarũ Īgu opu Īgu arĩrire ĩhmubu.

Goãtm̃ magu anyua tauro ãhrimi

⁴ Īgu Goãtm̃ magũ waĩcũmi. Eropa waĩcũgu gajirã tauro opu ãhrimi. Eropigu Īgu anyua weca tauro opu ãhrimi.

⁵ Īḡu anyuare Goām̄u ne ōpa arī werebirim̄urip̄u Īḡu magure werediro dopa ta:

Yu magu āhraa m̄uh̄u. Dohpagāre m̄ure dehyoac̄ũ iiab̄u, arīp̄u Goām̄u Īḡu magure.

Anyuar̄ure ne eropa arī werebirim̄urip̄u. Eropiḡu erāre i s̄āre ne werebirim̄urip̄u:

Īḡu pagu āhraa yuh̄u. Eropiḡu Īḡu yu magu arīḡuc̄umi, arīp̄u Goām̄u Īḡu magure.

Anyuar̄ure ne eropa arī werebirim̄urip̄u. Eropiḡu Īḡu magu anyua tauro arīp̄u.

⁶ Eropiḡu gajisub̄u Īḡu magure masa dehyoagure i yeba apōpa aiḡu ōpa arīp̄u Goām̄u Īḡure:

Árīpehrer̄ā yahar̄ā anyua yu magure mereja, Īḡure umupeor̄ācoma er̄ā, arīp̄u Īḡu.

⁷ Eropiḡu Īḡu anyuar̄ure werebu ōpa arīp̄u Īḡu: Yahar̄ā anyuare miruñe iro dopa d̄ur̄uc̄ur̄āre iiaa yuh̄u. Er̄ā yu pohro majar̄ā āhr̄ima.

Eropiḡu erāre peame iro dopa árīc̄ũ iiaa yuh̄u, arī werep̄u Goām̄u mari Pagu.

⁸ Er̄āre Īḡu eropa arīquereḡu ta Īḡu magur̄ure ōpa arīp̄u:

M̄uh̄u Goām̄u árīpehrer̄ā tauro op̄u eropa árīniguic̄aḡuca. Diaye ta doreḡuca m̄uh̄u m̄u yar̄āre.

⁹ Diaye árīr̄ire, ōaro iir̄ire turaro gahmea m̄uh̄u. Eropiḡu ñero iir̄ire gamebeaa m̄uh̄u.

M̄uh̄u eropa árīḡu árīc̄ũ ĩaḡu, yuh̄u m̄u Pagu árīpehrer̄ā gajir̄ā tauro m̄ure mucubiric̄ũ iiab̄u, arīp̄u Goām̄u.

¹⁰ I s̄āre arīp̄u Īḡu Īḡu magure “Op̄u,” arī piyuḡu: Op̄u, negohraguere i yebare, umaro s̄āre ĩhac̄ũnugub̄u m̄uh̄u.

11 Iri árīpehreri pehrea waroca. Mupɔ eropa árīniguigɔca. I yeba árīpehreri suhriro iriñe boaro dopa ta pehrea waroca.

12 Iri árīpehreri i yebare umaro sãre gohrotocũ iigɔca mɔhɔ. Murañe suhrirore mɔ cohã gajiñe mera gohrotoro dopa ta árīpehrerire gohrotocũ iigɔca mɔhɔ. Mupɔ mɔ árīdiro dopa árīniguicãgɔca. Eropigɔ ne gohrotosome. Eropa árīniguigɔca mɔhɔ, arīpɔ Goãmɔ ĩgɔ magure.

13 Gajisubu òpa ĩgɔ magure arĩgɔ iri sãre anyuapɔre ne werebirimuripɔ Goãmɔ:

Yɔ diayerɔ doaque mɔhɔ. Eropigɔ mure ĩhaturirãre tarinugabasadoregɔra. Eropigɔ erã weca opɔ árĩque mɔhɔ, arīpɔ Goãmɔ ĩgɔ magure.

14 Árīpehrerã anyuapɔ Goãmɔ pohro majarã dihta àhrima. Eropiro Cristo ĩgɔ taumorãre itamudoregɔ Goãmɔ obeomurimi erãre.

2

Goãmɔ yare òari buherire marire eropa pepibiricãro gahmea

¹ Eropigɔ Goãmɔ magɔ gohra marire weregɔ ĩgɔ árĩcũ masirã ĩgɔ wererare mari peerare òaro guñaro gahmea marire irire cãdijiri arĩrã.

²⁻³ Anyua masare erã wererare masapɔ erã tarinugacũ ĩagɔ Goãmɔ masare dipuwaja moapɔ. Eropigɔ erã anyua werera iri diaye árĩcũ ĩhmuɔ ĩpɔ. Eropiro anyua erã werera iri diaye árĩcũ marire irire peero gahmea. Erã tauro Cristopɔre peero gahmea marire. ĩgɔ mari Opɔ ĩgɔ marire taaborore weremɔhtarɔ.

Eropirã ïgure peenirãpũ ïgu wererare marire wereturiañorã marire õaro masicũ iirã. Eropigũ iri buherire “Jesucristo marire ïgu taugũcumĩ,” arĩ buherire mari eropa pepicãcũ Goãmũ marire dipuwaja moagũcumĩ. ïgu dipuwaja moaborore duhrimasibeaã mari.

⁴ Irire peemũhtanirã erã buhe weca peoro watope Goãmũpũ iri buherire diaye ta árĩcũ ïhmudi árĩmi. Eropigũ erã irire buherã ïgu turari mera baja deyoro moari erã ii ïhmucũ iri buherire diaye ta árĩcũ ïhmudi árĩmi masare. Eropigũ ïgu Espíritu Santo mera iri buheri diaye ta árĩcũ ïhmudi árĩmi. Espíritu Santo Jesu yarãre yujurãyerire Goãmũ yare erã mohmema-siburire apidi árĩmi erã game itamuboro dopa. ïgu gamediro dopa ta apidi árĩmi erã mohmema-siburire erãre.

Jesucristo mari iro dopa ta dũpũcũgu masa dehyoapũ, arĩ gojañumi

⁵ I umũ pehrerinũ árĩcũ Goãmũ pohro árĩrã tauro oparã árĩsome anyuapũ. Erãre oparã acusome Goãmũ.

⁶ Anyuare oparã acubiriqerrecũ Goãmũ yare weremũhtadigũ õpa arĩ gojañumi iribojeguere Goãmũ ïgu oparã acumorãre:

Gua masa bu gohra gua árĩrã árĩqerrecũ ta guare guñaã mũhũ. Gua masare õaro árĩcũ iiaã mũhũ.

⁷ Bajamenũrigã anyua doca masare apiyoro mũhũ. Eropã apiqerregũ ta guare turari ogũ oparã acuyoro mũhũ.

⁸ Mũhũ eropa acucũ i yeba maja weca árĩpehneri weca áhrra gũa masa, arĩ gojañumi iribojegue majagũ mari Pagũre.

Goãmũ masare apigũ i yebaguere árĩpehnerã waimũrã sãre masa dorero doca árĩmorãre apiñumi. Masare ĩgũ eropa oparã acucuerẽcũ ta erã waimũrãre árĩpehnerãre doremasibeama dohpa.

⁹ Jesupũ árĩpehnerã weca opũ áhrimi. Bajamenũrigã anyua doca mari Pagũ ĩgũ sãre apipũ. Mari yañe árĩborañere sĩribasabure ĩgũre eropa apidi árĩmi. Mari Pagũ marire mahigũ Jesure mari ya árĩburire ĩgũ sĩricũ gamepũ. Eropigũ ĩgũ eropa sĩricũ ĩagũ ĩgũre turarire ogũ, opũ acupũ ĩgũre pare árĩpehnerã ĩgũre umupeoborore.

¹⁰ Goãmũ árĩpehnerire ĩhacũnuguñumi. Eropiro árĩpehneri ĩgũ ya dihta áhrra. Eropigũ Jesure sĩridoregũ masa erã ñerire cãdijicũ iipũ ĩgũre. ĩgũ masa bajarã ĩgũ porã árĩmorãre umarogue õarogue aĩgãbu eropa iipũ. ĩgũ eropiicũ tamera õapũrica. Eropigũ Jesupũ marire taugũ mari opũ ta áhrimi.

¹¹ Árĩpehnerã masa erã ñerire cóãdi árĩmi Jesucristopũ. Eropigũ ĩgũ ñerire cóãnirã mera Pagucumi Goãmũre. Eropigũ mari Pagũ yujugũ ta áhrimi. Mari Pagũ ĩgũ arĩcũ Jesu marire ĩgũ ñerire cóãnirãre “Yũ acawererã áhrima,” arĩ piyugũ ne gũhyasĩribeamĩ.

¹² Ōpa arĩgũ iipũ ĩgũ Pagũre:

Mũ árĩricũre weregura yũ acawererãguere.
 Árĩpehnerã yaharã gamenererã pohro

mure umupeogu “Turagu ahrimi,” ari
weregura yuhu erare, aripu igu igu
Pagure, ari gojara ahraa.

13 Eropigu opa aripu daja:

Yu Pagure guñaturaguca yuhu, aripu, ari gojara
ahraa.

I sare aripu igu Jesucristo:

Ohõ ahraa yuhu. Goamu porã igu yure apinirã
yu acawererã mera ohõ ahraa, aripu igu.

Igu yarare “Yu acawererã,” ari piyugu
eropa aripu.

14 “Yu acawererã,” igu ari piyurã dupucurã
mari arĩcũ ñagu, Jesupu mari ya dupu mari
iro dopa arĩgu aripu. Eropa arĩgu arigu igu
crusague sirigu aripu watire dederecũ iibu. Igu
watipu siridoregu ahrimi marire.

15 Eropa ii igure dederecũ iidi arĩmi marire
tauboro dopa. Maripu umuri nucu mari
siriborore guiribu. Eropa guirã guiro doca arĩrã,
ñero siporãcũrã arĩribu mari. Eropa arĩrã mari
arĩcũ ñagu igu marire taumi.

16 Eropa taugu anyuapure itamugu aribiripu
igu. Abrahã pãamerare maripure itamugu
aripu.

17 Eropigu igu mari acaweregu iro dopa aripu.
Yujuropa ta mari iro dopa ta dupucugu aripu.
Eropa arigu mari masa ya arĩburire siribasagu
mari ñeri iirare Goãmure cóadoregu aripu.
Eropigu pahia oparã erã Goãmure ya arĩburire
serēbasaro dopa ta ñaro itamuboro dopa mari
iro dopa dupucugu arigu iipu. Erã tauro marire
igumojomoro ñhami. Eropigu marire ñaro
itamuniguicãmi.

18 Īḡu ñero taripũ. Eropigũ watĩ ĩḡure ñero iidoreripũ. Iibiripũ ĩḡu. Eropa ñerire tarinũgadigũ árĩḡu, ĩḡu mari sãre ñerire tarinũgacũ iimasimi. Watĩ ĩḡu ñerire iidorecũ ĩḡu marire ñerire iibiricũ iimasimi.

3

Jesu Moise tauro árĩḡu ãhrimi

¹ Jesu ĩḡu eropa árĩḡu árĩcũ ĩarã ĩḡure burigã guñaque mũa. Yũ acawererã, Jesu yarã, Goãmũ ĩḡu yarã árĩmorãre mũare beyedigũ árĩmi ĩḡu. ĩḡu Jesupũ Goãmũ ĩḡu apidigũ árĩḡu mari pahia opũ ãhrimi. I yeba majarã pahia oparã tauro ĩḡupũ mari ya árĩburire Goãmũre serẽbasagũ ãhrimi marire. Eropirã ĩḡure õaro guñaque mũa umupeodigare.

² Goãmũ ĩḡure marire ĩḡu tauborore ĩḡu apicũ ĩḡupũ ĩḡu apidiro dopa ta iipũ. Ne tarinũgabiripũ. Moise sã iribojegue majagũ Goãmũ yarã Israe masare itamugũ ne tarinũgabiripũ. Eropa ta iipũ Jesu sã.

³ Eropiro Moiserẽ erã umupeodiro tauro Jesupũre umupeoro gahmea marire. Ōpa ãhraa iri. Wihire mari “Ōari wihi ãhraa,” arĩro tauro wihire iidigũpũre “Ōapũricãmi,” arĩro gahmea marire. Eropigũ Jesupũ wihi iidigũ iro dopa ãhrimi. ĩḡu eropa árĩḡu árĩcũ ĩḡupũre Moise tauro umupeoro gahmea marire.

⁴ Masapũ wirire iirã ãhrima. Goãmũpũ árĩpehrerire iigũ ãhrimi.

⁵ Moisepũ Goãmũ mohme coregũ árĩḡu Goãmũ ya curu majarãre itamuniguigũ árĩmũripũ.

Puhrugue Goãmũ ãgũ masare wereborore weremuripũ masare.

⁶ Cristopũ Goãmũ magũ árĩgũ ta, Goãmũ yare iiniguicãgũ árĩgũ Goãmũ ya curu majarã tauro opũ ãhrimi. Eropirã Moise tauro Cristopũre umupeoro gahmea marire. Eropirã maripũ Cristore guñatura duhubirã árĩrã marire ãgũ tauborore eropa mucubiri coreniguicãrã ãgũ ya curu majarã ãhraa mari.

Goãmũ ãgũ yarãre ãgũ mera õaro soocũ gameñumi

⁷ Eropirã Jesucristore mari umupeo duhubiri-borore õpa iro gahmea marire. Irire weremi Espíritu Santo Goãmũ yare gojarapũguere.

Dohpagãre yũhũ Goãmũ mũare yũ werecũ yũhridibirã árĩbircãque mũa.

⁸ Eropirã õaro yũhrique yũre mũa. Iribojegue Is-rae masa masa marirogue árĩrã yũ werequerecũ ta umupeodiabirã yũre yũhribirimũrima. Eropa iirã yũre ãhasuabircã iima. Eropirã erã iidiro dopa iibircãque mũapũ yũre.

⁹ Eroguere cuarenta bojori gohra erãre deyoro moarire ii ãhmuribũ erãre itamugũ. Yũ eropa ii ãhmuquerecũ ta erãpũ õpa arĩ pepimũrima yũre duyasorã. “Goãmũ marire itamumasisome,” arĩ pepimũrima. Eropa arĩ pepirã ñero iimũrima.

¹⁰ Erã eropiicũ ãagũ erã mera guabũ. Eropa guagũ õpa arĩbũ: “Erã yahare peediabirã gajiropa árĩri buherire eropa guñamaacãrã ãhrima,” arĩbũ. “Yahapũre ne buhediabeama,” arĩbũ erãre.

11 Eropigu erã mera guagu õpa arĩ werebũ: “Erã yũ mera majarã ne árĩsome. Eropirã yũ mera õaro soosome erã,” arĩ werepũ Goãmũ.

12 Eropirã, yũ acawererã, õaro iique mũa Goãmũre cohmore arĩrã. Mũa ñerire pepirã, Goãmũ ojocarigũre “Diaye iimi ãgu,” arĩ umupeobirã, ãgũre cóãboca mũa. Ne yujugũ mũa mera majagu eropa iibiricãporo.

13 Eropirã ipũre iiro gahmea: Mũa mera majarã umũri nũcũ Goãmũ yare mũa basi game wereniguque ñerire iiri arĩrã. Ñerire iirã “Iri mera mucubiria,” arĩrã, gũyarire pepirã iiaa mari. Eropa pepibiricãque. Ñeripũre iiniguirã Goãmũ yapũre sũabeaa mari. Eropa iirã ñerire duhudiabirã wahaa. Eropa iiri arĩrã mũa mera majarãre Goãmũ yare mũa basi game wereniguque. Jesucristo ãgu dujariboro core eropa game wereniguque.

14 Eropirã negohrare Cristore mari umupeonũgadiro dopa ta eropa ta mari umupeoniguicãrã, mari ojocaripopẽ ãgu yare duhubirã ãgu mera majarã ãhraa.

15 Goãmũ yare erã gojarapũ yũ dohparagã werediro dopa werea daja mũare Goãmũ wereniguirire:

Dohpagãre yũhũ Goãmũ mũare werecũ õaro yũhrique mũa yũre. Iribojegue majarã Israe masa erãre yũ werequerecũ ta umupeodiabirã yũre yũhridiabirima. Eropirã erã iidiro dopa iibiricãque mũa, arĩmi Goãmũ, arĩ gojañuma iribojeguerẽ.

16 Eropirã Goãmũ ïgũ wererare peenirã árĩquererã erã ïgũre yũhribirimariñorã. Erã árĩpehrerã Egiptogue ñero tarinirãre Goãmũ Moise mera ïgũ wiunirã árĩñorã. Erã eropa árĩquererã ïgũre ne yũhribiriñorã.

17 Eropigũ erã ñero iicũ ïagũ cuarenta bojori gohra Goãmũ erã mera guapũ. Erã ñero iira dipuwaja erogue masa marirogue erãre dujadorepũ. Eropirã erore sĩria wamuriñorã erã.

18 ïgũre erã eropa yũhridiabiricũ ïagũ õpa gũhyadiaro mera arĩpũ ïgũ: “Erã yũ mera majarã ne árĩsome. Eropirã yũ mera ne õaro soosome erã,” arĩpũ ïgũ.

19 ïgũ eropa arĩcũ peerã ire masia mari: Erã Goãmũre erã umupeobiriri waja, ïgũ mera majarã árĩmasibiriñorã. Eropirã ïgũ mera õaro soomasibiriñorã.

4

1 Eropigũ iribojegue majarãre ïgũ mera õaro erã sooborore gamegũ erãre “Yũ mera soorãca,” arĩ apipũ Goãmũ. Mari sãre eropa ta arĩ apipũ ïgũ. Eropirã gũhyadiaro mera Goãmũre õaro yũhrirã mari wieri marigue arĩrã. Eropa wierã ïgũ mera õaro soosome mari.

2 Iribojegue majarã Goãmũ yare erã peediro dopa ta mari sã õari buherire peebũ. Erãpũ peerã “Goãmũ diaye iigũ àhrimi,” arĩ pepibirimuriñorã. Goãmũre umupeobirimuriñorã. Eropiro Goãmũ yare peequererã yũhribiricũ erã peera ñehe árĩburi árĩbiriyoro erãre.

³ Maripũ ĩgũre umupeorã dihta Goãmũ mera majarã árĩrãca. Eropirã ĩgũ mera õaro soorãca. Goãmũ õpa arĩpũ:

Erã mera guagũ gũhyadiaro mera õpa arĩ werebũ: “Yũ mera ne soosome erã,” arĩ werebũ, arĩyoro Goãmũ yare erã gojarapũgue.

Eropa arĩpũ ĩgũ. I yebare ĩgũ ĩhacũnugura pũhrũ soorpũ ĩgũ. Eropigũ masa sã ĩgũ mera sooborore amuyupũ. Amuqueregũ erãpũre “Yũ mera ne soosome erã,” arĩpũ Goãmũ.

⁴ Seis nũri ĩgũ ĩhacũnugura pũhrũ ĩgũ soorare õpa arĩ gojañuma Goãmũ yare erã gojarapũgue: Seis nũri pũhrũ árĩpeherrerire ĩgũ iirare pehogũ, Goãmũ mohmeduhu soorpũ, arĩ gojañuma ĩgũ yare erã gojarapũgue.

⁵ Eropiro Goãmũ yare erã gojarapũ õpa arĩ werea daja ĩgũ mera õaro árĩbirinirãre:

Yũ mera majarã ne árĩsome erã. Eropirã ne yũ mera soosome, arĩpũ Goãmũ.

⁶ Eropirã õari buherire peemũhtanirã, ĩgũre erã tarinũgara dipuwaja ĩgũ mera majarã árĩbirã ĩgũ mera soobiriñorã erã. Gajirãpũ ĩgũ mera majarã árĩrãcoma. ĩgũ mera soorã árĩrãcoma.

⁷ Eropigũ masa ĩgũ mera õaro árĩburire erã ĩgũ mera sooburire apigũ daja, “Dohpaguere ãhraa,” arĩ apipũ Goãmũ. Israe masa Goãmũre erã tarinũgara pũhrũ baja bojori pũhrũ irire weredorepũ Davire. Davi were gojarare mũare weretuhajaqueregũ weregũra daja yũhũ. Eropigũ õpa arĩ gojañumi Davi Goãmũ wereniguirire:

Dohpagãnure yũhũ Goãmũ mũare yũ werecũ,
tarinũgaro mariro õaro yũhrique mũa
yũre, arĩ gojañumi iribojegure.

⁸ Ero coregue Josué Israe masare Goãmũ ĩgu ora
yebague aĩ ejapũ. “Yũ mera soorã árĩrãcoma,”
arĩgu iri yebague erã sooborore arĩgu iibiripũ
Goãmũ. Iri yeba soodoregũ gajinũ erã sooburire
apibiriboñumi ĩgu.

⁹ Seis nũri pũhrũ i yebare ĩgu iira pũhrũ Goãmũ
ĩgu mohmeduhu soodiro dopa ta mari ĩgu yarã
sã ĩgu mera mari sooburiñe ãhraa. ĩgu mera
mari õaro árĩburiñe ãhraa.

¹⁰ Eropigũ Goãmũ soogũ, ĩgu mohmerare
duhucãnipũ. Eropa ta ĩgu mera soorã mari
gamero mera iirire duhucãrãca.

¹¹ Eropirã mari ĩgu yarã õaro iirã. Goãmũ
yare õaro yũhrirã ĩgu mera mari sooboro
dopa. Iribojegue majarã mari acawererã
erã tarinũgara pũhrũ Goãmũ mera majarã ne
árĩmasibirimũriñorã erã. Erã iidiro dopa iibir-
icãrã mari.

¹² Goãmũ ya wereniguiri marire Goãmũ mera
õaro árĩniguicũ iiaa. Õaripũre marire gohro-
tocũ iiaa. Eropiro ĩgu ya wereniguiri bu árĩri
árĩbeaa. Eropiro matamiji pepũripũ usirimiji
mera dirore erã wiri ĩha erã masiro dopa ta, ĩgu
ya wereniguiri mari árĩricũrũre mari pepirire
õaro masicũ iiaa marire. Eropa masirã mari
iiricũri õaro árĩcũ, õaro árĩbircũ sãre masia
ĩgu wereniguirire peerã. Iri mari buhecũ mari
árĩricũrũre õaro masipehocũ iiaa marire.

¹³ Ne Goãmũre mari árĩricũrũre mari
iirare duhmasibea mari. Árĩpehrerire ĩgu

ĩhacũnugurare ĩgu ĩhacũnugunirã sãre ĩhami ĩgu. ĩgu tamerare mari iirare mari pepirire werepehorãca mari.

Jesu turagu mari pahia opa aħrimi

¹⁴ Jesu Goãmũ magu ĩgu sĩrira pũhrũ ĩgu Pagu pohrogue dujadigu arĩmi. ĩgu turagu mari pahia opa aħrimi. Eropigu mari ya arĩburire Goãmũre serẽbasami. ĩgu eropa arĩgu arĩcũ ĩarã maripu ĩgu yare õaro yũhrirã arĩrã ĩgure õaro umupeoniguicãrã.

¹⁵ ĩgu Jesucristo mari pahi arĩgu mari ñero taricũ õaro mojomoro ĩagu aħrimi. Mari ñerire uaribejarire masimi ĩgu. Watĩ arĩpehreri ñerire ĩgu marire iidorero dopa ta Jesu sãre ñerire iidoreripu. ĩgu eropa iidorequerecũ ĩgu ñerire iibiripu. ĩgu eropa ñerire iidorerire iidoredigu arĩgu marire mojomoro ĩagu marire itamumasimi.

¹⁶ Eropirã “Yũre yũhrigucumi,” arĩrã Goãmũre serẽrã. ĩgu marire mahimi. Eropigu mari ĩgure serẽcũ marire mojomoro ĩagu marire itamugucumi. Eropigu mari ñero iidiacũ sãre ĩgu marire itamugucumi.

5

¹ Arĩpehrerã pahia oparã, masa mera majarã aħrima. Beyenirã aħrima erã mera majarã yare Goãmũre serẽbasamorã. Eropirã masa ñerire erã iira dipuwajare Goãmũre serẽbasama erã mera majarãre. Eropa serẽbasarã waibugure wejẽ soe mujuma Goãmũre.

2 Pahia oparã gajirã masa iro dopa õaro masipehobirã ãhrima. Gajisubu õarire iibirã ãhrima erã sã. Eropa masibirã árĩrã gajirã masibirãre itamumasima nijiyajaro mera. Eropirã õarire iibirã sãre õaro mera itamumasima.

3 Eropirã õaro masipehobirã ñeri iira dipuwajacurã ãhrima erã sã. Eropirã erã basi erã ñerire erã iira dipuwaja waibugure wejẽ soe mujuma Goãmure. Gajirã masa ya árĩburire erã ñeri iira dipuwaja erã serẽbasadiro dopa ta, erã basi erã ya árĩburi sãre serẽma Goãmure.

4 Eropigũ ãgũ ãgũ gamero pahia opũ ñajabeami. Goãmupũ ãgure beyegũ, pahia opũ acumi. Iribojegue majagũ Aarõ murure ãgũ apidiro dopa ta gajirã pahia oparã sãre apimi ãgũ.

5 Eropa ta Cristo sã ãgũ basi ãgũ gamero pahia opũ ñajabiripũ. Goãmupũ ãgure opũ acugũ õpa arĩpũ:

Yũ magũ ãhraa mũhũ. Dohpagãre mure de-
hyoacũ iiabu yũhũ, arĩpũ Goãmũ.

6 Gajisubu õpa arĩpũ Goãmũ Cristore:

Árĩpehrerirũre pahi árĩniguicãgũca mũhũ.
Melquisede ãgũ árĩdiro dopa ta pahi
árĩniguicãgũca mũhũ, arĩpũ ãgũ magure.

7 Cristo i yeba árĩgũ burigã gaguinigui, co deco mera Goãmure turaro serẽpũ ãgũ, “Yure masuque,” arĩgũ. Mari Pagupũ Goãmupũ ãgure sĩridigure masumasigu arĩpũ. ãgũ eropa serẽcũ Goãmũ peepũ ãgure. Goãmũ gameri dihtare ãgũ iidiacũ ãagũ Goãmupũ ãgũ serẽrare peegũ yũhrĩpũ.

⁸ Eropigu Cristo Goãmũ magũ árĩqueregũ ñero taripũ ĩgũ. Eropa ñero tarigũ yũhrĩpũ Goãmũre. Eropa yũhrigũ õaro yũhrĩre masituhapũ.

⁹ Eropa yũhrĩdigũ crusague sĩrigũ masa erã ñerire cãdijigũ árĩpehrerã ĩgũre yũhrĩrãre taubu warũ.

¹⁰ Eropigu Goãmũpũ ĩgũre pahia opũ masa yare serẽbasabure apĩpũ. Eropigu Melquisede pahia opũ ĩgũ árĩdiro dopa ta ãhrimi Cristo.

Cristo yarã ĩgũre umupeo duhucũ gũhya ãhraa

¹¹ Baja õpa árĩrĩre mũare werenemodiaa gũa. Gũa eropa werenemodiaquerecũ ta mũapũ peediabirã ãhraa. Eropirã mũare gũa werecũ mmasumasigũ árĩpũ. ĩgũ eroasiya mara.

¹² Yoari boje Cristo yarã árĩraa mũa. Eropa árĩrã dohpaguere gajirãre buherãgue árĩboca mũa. Mũa eropa árĩbonirã árĩquerecũ ta gajirã mũapũre buherãcoma. Goãmũ yare mũare buhemũhtarare mũare buhero gahmea daja. Ne buhenũgarã iro dopa ta ãhraa mũa.

¹³ Apĩco mĩhrirã majirãgã árĩnima. Erã iro dopa ta mũa sã ãhraa õaro masibirã árĩrã. “I ñeri ãhraa. ĩpũ õari ãhraa,” arĩ ĩha masibea mũa.

¹⁴ Barire barãpũ mũrã ãhrima. Erã iro dopa árĩrã õaro buhenirã õaro pepi masirã mũa árĩcũ õaboaya. “I ñeri ãhraa. I õari ãhraa,” mũa arĩ ĩha masirã árĩcũ õaboaya.

6

¹⁻² Eropirã Goãmũ yare õaro masirã, õaro yũhrĩrã árĩrã. Cristo yare negohraguere

buhenuḡarã õpa masinuḡabu mari: Mari gamero mera mari iiri duhpiburi árĩbeaa. Mari iiri mera tariſome mari. Tarimorã Goãmure umupeoro gahmea marire. Ire negohraguere buhenuḡama marire. Eropirã marire waĩyema. Mojotorire marire erã duhpeorire buhe, sĩrinirã erã masa m̄riborore buhe, i um̄ pehrera puhr̄u Goãm̄u ĩḡu dipuwaja moaborore buhe, ĩḡu dipuwaja moamorã erã ñero tariniguiboro sãre buhe, i sãre marire negohraguere buhenuḡama. Eropa árĩri buherire mari masituhajarare buhenemobirã gaji buherire õaro buhenemorã.

³ Eropirã Goãmure, ĩḡu ya sãre masinemorã. Goãm̄u ĩḡu gamecũ eropa ta iirãca mari.

⁴ Goãm̄u yare masinirã irire duhurãre ne dipaturi erãre erã ñeri iirare erãre bujawerecũ iimasiya mara daja. Eropa árĩrã, Cristo ĩḡu taunirã árĩrã Espĩritu Santore oparima.

⁵ Eropirã Goãm̄u ya wereniguirire peerã õari wereniguirire iri árĩcũ masirima. Eropirã pehrerin̄u puhr̄uḡue Goãm̄u ĩḡu turari mera mari eropa árĩniguiborore, masare ĩḡu dipuwaja moaboro sãre erã masirima.

⁶ Eropa árĩrã Cristo yare erã duhurã Goãm̄u magure dipaturi crusague erã pabiadiro dopa ta ĩḡure iirã iima. Erã eropiicũ ĩarã gajirã masa Cristore wereyama. Eropirã dipaturi erãre, erã ñeri iirare erã bujawere õarire gohrotocũ iimasiya mara.

⁷ Õpa ãhraa iri mari werenigui queori mera buhecũ: Õari yebare w̄aro deco aricũ erã oteri õaro puhri d̄acac̄ua. Eropiḡu iri pohe opu

ducare opami ĩgu baburire. Iri yeba õari yeba árĩcũ ĩha mucubirimi. Eropa ta Goãmũ iimi ĩgu yare peenirã sãre. Erã ĩgu yare õaro iicũ ĩha mucubirimi erã mera.

⁸ Gaji yebapũ añapora mera, taa mera iri yeba tiaro duhpiburi yeba árĩbeaa. Eropa árĩri pohere cóãcãro gahmea. Eropa ta Goãmũ iimi ĩgu ĩgu yare peequererã iibirãre. Erãre dipuwaja moa peamegue cóãgũcumi.

Cristore eropa umupeoniguirãre taumi Goãmũ

⁹ Yũ mahirã, mũare eropa arĩ werequeregũ ta mũapũre “Cristore duhuristo yare erã duhurã Goãmũ mã ãhraa,” arĩgũ iibeaa. Mũapũ Cristo ĩgu taurã ãhraa. Eropirã õarire iirã iica mũa. Irire masia yũhũ.

¹⁰ Mari õaro iira waja Goãmũ queoro marire õaro iigũ ãhrimi. Eropigũ ĩgu ya árĩburire mũa turaro mohmerare cãdijisome ĩgu. Mũa ĩgure mahirã ĩgu yarãre itamuabũ mũa. Dohpague sãre erãre itamuniguia mũa. ĩgure mũa eropa mahirare cãdijisome ĩgu.

¹¹ Mũa ojocarinigucãropẽ gajirãre mũa umupeocũ, mũa itaisto yare erã duhurã Goãmũ mmuniguicũ sãre gahmea gũa. Mũa eropiicũ ĩagu õaro iigũcumi mari Pagũ mũare.

¹² Eropirã mũa tericũrã árĩcũ gamebeaa gũa. Gajirã Cristo yarã ñero tariquererã Goãmure “ĩgu diaye ta árĩgũ ãhrimi,” arĩ umupeoniguicãma. Erã eropiicũ ĩagu Goãmũ “Masare õarire ogũra,” ĩgu arĩdiro dopa ta erãre opehogũcumi. Eropirã mũa sã erãre ĩhacũrã erã iro dopa ta iiniguicãque.

13-14 Iribojegue Goãmũ Abrahãre õpa arĩ apirũ: “Yũ waĩ mera diaye ta ire arĩgũ iiaa mure. Mure õaro iigũra. Eropigũ mũ pãramerã árĩturiarãre bajarã masa árĩcũ iigũra,” arĩ werepirũ Goãmũ. Eropa arĩ werepigũ ãgũ ya waĩ mera waĩpeorũ. Gajigũ ãgũ tauro arĩgũ ne maricũ ãgũ ya waĩ mera eropa waĩpeorũ.

15 “Mure õaro iigũra,” Goãmũ ãgũ arĩ apirare Abrahãpũ õaro ãgũ umupeoyura pũhrũ Goãmũ ãgũ arĩdiro dopa ta ãgũre õaro iipũ.

16 “Goãmũ mera diaye arĩgũ iiaa,” masapũ arĩrã, erã erã tauro arĩgũ waĩ mera waĩpeorã iima. “Goãmũ mera diaye arĩgũ iiaa yũhũ,” yujugũ ãgũ arĩcũ gajigũ peegũ “Diaye ãhraa,” arĩgũcumĩ. Dũyasomasibeamĩ.

17 Eropigũ Goãmũ Abrahãre “Mure õaro iigũra,” arĩ apigũ “Yũ waĩ mera diaye ta arĩgũ iiaa,” arĩ waĩpeorũ. ãgũ eropa waĩpeo wererare peerã “Diaye ta ãhraa iri,” arĩ masia. Eropirã “ãgũ arĩrare ne gohrotosome,” arĩ masia mari. Irĩre mari masiboro dopa ãgũ arĩ apira mera ãgũ waĩpeogũ eropa werepirũ.

18 Eropigũ ãgũ arĩ apira mera, ãgũ waĩpeora mera diaye ãgũ arĩrare masicũ iipũ Goãmũ marire. Eropiro ãgũ waĩpeocũ ãgũ arĩ apira ne gohrotosome. Eropigũ Goãmũ ne gũyabeamĩ. ãgũ eropa arĩgũ árĩcũ masirã, mari marire ãgũ tauborore mucubiri corerãca, “Eropa ta iigũcumĩ,” arĩrã.

19-20 Eropa ãgũ tauborore corerã guñaturarã ãhraa mari. Eropa arĩrã “Mari sirĩrã Goãmũ pohro warãca,” arĩ masirã gũibeaa. Pahia

opu Goãmũ ĩgu árĩri taribu gohrague ñajagu, cãhmotariñe suhriro pohecague tariñajami. Eropa ñajagu masa ya árĩburire serẽbasami Goãmũre. ĩgu eropiidiro dopa ta Jesu sã umarogue Goãmũ árĩroque ñajamũhtadi árĩmi. Eropa ñajamũhtagu mari sãre erogue ñajaburire ahmu serẽbasami. Eropigu árĩpehrerinũri nũcu serẽbasagu iimi pahia opu árĩgu. Melquisede pahi ĩgu árĩdiro dopa ta pahia opu ãhrimi ĩgu Jesu.

7

Melquisede pahi ĩgu árĩdiro dopa ta Jesu pahia opu ãhrimi, arĩ gojañumi

¹ Melquisede iribojegue majagu Salem waĩcũri maca majagu opu árĩmũripũ. Eropigu pahi árĩgu Goãmũ turagure umaro majagure masare serẽbasagu árĩmũripũ. Eropigu gajirã oparãre Abrahã gamewejẽtuha, ĩgu dujaricũ gohra, Melquisede ĩgu ya maca árĩdigu waha, Abrahãre bocatĩripũ. Eropa bocatĩrigu ĩgure serẽbasapu Goãmũre: “Õaro iique ĩre,” arĩ serẽbasapu Abrahãre.

² Abrahãpu ĩgu gamewejẽ tarinũgara pũhru gajirã oparã yare aĩ dujarũ. ĩgu eropa aĩ dujarare merogã dũhapũ ĩgu Melquisedere. Diez ĩgu aĩ dujara árĩcũ yujuñe ópu Melquisedere. Melquisede ĩgu waĩ mari ya mera arĩro “Tauro opu õaro iigu ãhrimi,” arĩdiaro iiaa. Eropigu ĩgu Salem waĩcũri maca majarã opu ĩgu árĩcũ iri maca maja waĩre waĩcũpu. Salem waĩ opa

arĩdiaro iiaa: “Tauro opu masare òaro game mahicũ iigu ãhrimi,” arĩdiaro iiaa.

³ Ne Melquisede pagu sumarãre, ïgu core arĩmuhtanirãre, ïgu acawererãre erã were gojatura mara. ïgu masa dehyoarare, ïgu sĩrira sãre were gojatura ne mara. Eropigu eropa arĩniguigu iro dopa arĩpu ïgu. ïgu eropa arĩgu arĩcũ Goãmu ïgu magu ïgu pahi ïgu arĩrare marire buhemi. Melquisede pahi eropa arĩniguigu iro dopa ta ãhrimi ïgu Jesucristo Goãmu magu. ïgu iro dopa ta Cristo sã pahi arĩgu eropa arĩniguicãgu ãhrimi.

⁴ Eropigu Melquisede turagu arĩrare guñaque. Abrahã mari ñecũ murũ opu gohra arĩqueregu ta Melquisedepure ïgu duja aĩrare duhapu. Diez ïgu duja aĩra arĩcũ yujuñe opu Melquisedere. Eropa ta ïgu duja aĩ ïgu duharare opu ïgure.

⁵ Eropiro Moise ïgu doreri mera arĩpehrerã gajirã Israe masare iripẽta wajayedorepu erã pahiare. Eropa doregu Levĩ pãramerã arĩturiarãre erã acawererã arĩturiarã erã wajayerire ñeadoregu apimuripu. Levĩ pãramerã ya curu majarã pahia dihta wamuriñorã. Eropirã gajirã ya curu majarã sã Levĩ pãramerã mera Abrahã pãramerã arĩturiarã arĩmuriñorã. Erã acawererã arĩquererã erã Levĩ pãramerãre wajayemuriñorã.

⁶ Melquisedepu Levĩ pãrami arĩturiagu arĩbriqueregu ta wajaseapu Abrahãre. Eropigu “Mure òaro iigura,” ïgu Goãmu arĩ apidigu arĩqueregu Abrahãpu Melquisedere wajayepu.

Eropigu Melquisedepu Goãmure Abrahãre serẽbasagu õaro árĩdoremuripu.

⁷ Õaro árĩdoregu Melquisedepu igu õaro árĩdoredigu Abrahã tauro árĩpu. Irire mari õaro masia.

⁸ Mari mera majarã pahia marire merogã wajasearã mari iro dopa ta masa ahrima. Eropa árĩrã sirmorã ta ahrima erã sã. Ihĩ Melquisedepu iribojegue Abrahãre merogã waseadigu eropa árĩniguigu iro dopa ahrimi igupu. "Igu siria wañumi," arĩ werera ne mara. Eropa ta ahraa Goãmu yare erã gojarapũgue.

⁹ Dohpague majarã Levĩ pãramerã árĩturiarã pahia árĩrã masare merogã wajaseamurima. Eropa árĩrã erã árĩquerecũ ta Abrahã erã ñecu árĩgu Melquisedere merogã wajayegu árĩpehrerã Levĩ pãramerã ya árĩburi sãre wajayebasagu iimuripu. Eropirã Levĩ pãramerã sã Melquisedere wajayenirã iro dopa ahrima.

¹⁰ Melquisedere Abrahã igu wajayerasubure Levĩpu masa dehyoanibiripu dohpa. Eropa masa dehyoabiriqueregu ta igu ñecu Abrahã dupugue igu árĩbodiropã dopa ta Levĩpu árĩtuhagu iipu. Eropigu Melquisede Abrahãre igu bocatĩricũ Levĩ sã igu ñecu mera igu árĩboropã dopa árĩgu iipu. Eropa árĩgu Levĩ, igu pãramerã mera Melquisedere merogã wajayenirã iro dopa árĩrã erã igu doca árĩrã iĩnorã.

¹¹ Igu dorerire apigu Goãmu Aarõ pãramerã árĩturiarã Levĩ ya curu majarãre pahia árĩdoremuripu. Eropirã igu doreri dorediro dopa ta erã pahia waimurãre soe mujurã masa

ya árĩburire serēbasamuriñorã Goãmure. Erã pahia erã eropiiquerẽcũ masa Goãmũ mera õaro wamorã árĩbirimuriñorã dohpa. Erã pahia erã iira mera masa õarã wacũ Goãmũ erãre gohrotobure Cristore obeobiriboñumi. Eropigũ ïgũ obeodigũ marire Goãmũ mera õaro árĩcũ iigũ aridi árĩmi Cristopũ. Ïgũ Leví ya curu majagũ Aarõ murũ iro dopa árĩbiripũ. Melquisede iro dopa árĩpũ.

¹² Eropigũ pahiare gohrotogũ, marire doreri sãre gohrotoro gãmemi ïgure. Pahia erã itamuri mera mari taribiro dopa ta iri doreri mera mari taribea. Eropiro iri dorerire gohrotopẽhoro gãmemi.

¹³ Aarõ Leví sã, erã ya curu majarã dihtare pahiare acumuripũ Goãmũ ïgũ dorerire apigũ. Ïgũ eropa acuquerẽcũ ta dohpaguere mari Opure Cristore pahire Goãmũ ïgũ acudigũ gajĩ curu majagũ ãhrimi.

¹⁴ Ïgũ mari Opũ Cristo Judá ya curu majagũ masa dehyoapũ. Moise pahiare acugũ, Judá ya curu majarãre ne acubirimuripũ. Irire õaro masia mari.

¹⁵ Ire masirã, õpa mari õaro masia: Dohpaguere ne ïgũ acudigũ pahi Cristo Melquisede iro dopa árĩgũ ãhrimi.

¹⁶ Iribojegue maja doreri dorediro dopa ta Leví ya curu majarã dihta pahia ñajamuriñorã. Jesucristopũ Goãmũ ne ïgũ acudigũ gajirã pahia erã iro dopa pahi ñajabiridigũ árĩmi. Ïgũ Goãmũ turari mera árĩpẽhrerĩnuri árĩgũ ãhrimi. Eropigũ iri turari mera pahi ñajadi árĩmi ïgũ.

17 Ōpa āhraa Goāmū yare weremūhtanirā erā gojarapūgue:

Árīpehrerinūrire pahi árīniguigūca mūhū.
Melquisede īgū pahi īgū árīniguidiro dopa
pahi árīniguicāgūca mūhū, arīpū Goāmū
īgū magūre, arī gojañuma iribojegūere.

18 Goāmū īgū doreri Moisere īgū apimūhtara
doreri turari árībiribū. Eropigū iri dorerire
duhucādi árīmi Goāmū.

19 Moisere īgū apira doreri mera ne ōaro
tariburire opabirimūribū mari. Eropigū doh-
paguerūre Goāmū marire īgū tauborore marire
apidigū árīmi. Īgū eropiicū dohpaguere īgū
pohrogue wamasia mari. Eropirā īgū mera
wereniguimasia.

20 Eropigū Cristore pahi acugū, “Yū wāi mera
mūre acugū iiaa,” arīpū Goāmū. Gajirā pahia
ñajacū īgū iro dopa wāipeo acubiripū erāre.

21 Cristopū īgū Pagū wāi werepira mera pahi
ñajapū. Ōpa arī werepipū īgū Pagū Cristore:

Yūhū mū opū yū wāi mera mūre weregū di-
aye weregūra. Eropigū ire ne gohrotoro
mariro werea mūre. Árīpehrerinūrire
pahi árīniguicāgūca mūhū, arī werepipū
Goāmū īgū magūre.

22 Eropa werepigū mama buherire marire apigū,
marire īgū tauborore apigū iipū. Iribojegūe
maja doreri tauro mari ōaro árīborore apigū
iipū. Eropigū Goāmū masare “Ōaro iigūra,”
īgū arīdiro dopa ta iibu, Jesure obeodigū árīmi
marire taubure.

23 Árĩmuhtanirã pahia erã sĩricũ ĩarã gajirã gohroto ñajamuriñorã daja. Eropirã erã bajarã pahia wañorã.

24 Jesupũ eropa árĩniguicãmi. Eropirã ĩgũre gohrotorã ne marima pahia.

25 Eropigũ ĩgũ eropa árĩniguigũ, Goãmũre eropa serẽbasaniguicãmi ĩgũ ĩgũ yarã ya árĩburire. Eropigũ Goãmũ mera erã eropa árĩniguiboro dopa masare taumasimi ĩgũ. Árĩpehrerã ĩgũre umupeorã Goãmũ pohrogue warãca. Eropigũ Jesu ãhrimi ƣputũ marire taubu.

26 Eropigũ Jesu ãhrimi mari pahia opũ. ĩgũ tamerare burigã gahmea mari. Ne ñeri dipuwaja marigũ ãhrimi ĩgũ. Eropigũ masa iro dopa ñerire iibiridi árĩmi. Eropigũ Goãmũ ĩgũre ñerã watope árĩdigũre aĩgũ, ƣmarogue apĩ, árĩpehrerã gajirã tauro árĩgũ opũ acupũ.

27 Gajirã pahia iro dopa árĩbeami ĩgũ. Erãpũ ƣmuri nũcũ waibũgũre wejẽ, soe muju serẽmũrima Goãmũre masa ñeri iira dipuwaja cãdijidorerã. Erã basi erã ñeri dipuwajare serẽmuhtamũrima. Pũhrũ gajirã ñeri dipuwaja sãre serẽbasamũrima erã. Eropirã erã bajasuburi eropa Goãmũre serẽbasamũrima. Jesupũ pahĩ árĩgũ, yujusubu ta masa ñeri dipuwajare Goãmũre serẽpũ. ĩgũ waibũgũre wejẽbiri ĩgũ basi sĩridigũ árĩmi mari masa ñeri iira dipuwajare taubu.

28 Goãmũ doreri Moiserẽ ĩgũ apira mura pahia oparã ñajadorea. Eropa erã ñajaquererã, ñeri marirã árĩbeama pahia ñajarã. Iri doreri pũhrũ Goãmũ ĩgũ magũre pahire acugũ “Diaye ta

pahi árĩniguicãgucumi,” arĩ acupũ. Īgũpũ ñeri mariro eropa árĩniguicãmi.

8

Goãmũ masare “Mũare taugũra,” arĩ apĩpũ daja ĩgũ Moisere arĩ apĩrare gohrotogũ. Īgũ mama apĩrare werebasagũ ãhrimi Jesu

¹ Iri árĩpeherrerire arĩ wererã i tamerare mũare arĩrã iiaa: Mũare gũa weredigũ pahia opũ ĩgũ tamera mari yagũ gohra ãhrimi. Mari ya árĩburire Goãmũre serẽbasagũ ta ãhrimi. Ũmarogue Goãmũ turatarigũ ĩgũ opũ doaro pohro ĩgũ diayerũ doami ĩgũ Cristo mari pahia opũ.

² Eropigũ Goãmũ wihi i yeba maja wihi, masa erã iira wihigue mohmebeami. Ũmarogue árĩri wihire mari Opũ ĩgũ iira wihire Goãmũ ya árĩburire mohmebasami. Iri wihi tamera Goãmũ ya wihi gohra ãhraa.

³ Eropirã árĩpeherrerã i yeba majarã pahia oparã waimũrãre wejẽ soe muju Goãmũre omũrima masa ñero iira dipuwajare cãdijidorerã. Eropa ta iimorãre apidigũ árĩmi Goãmũ. Eropigũ mari yagũ pahi Cristo sãre apigũ eropa ta iidorepũ. Eropigũ mari ñeri iira dipuwajare Jesucristo ĩgũ basi sĩridi árĩmi.

⁴ Moise doreri dorediro dopa ta i yebague pahia masa erã ñeri dipuwaja cóãburire mohmebasama. Eropirã i yebague pahia árĩtuhama. Erã eropa árĩtuhajacũ Jesupũ mari yagũ pahi i yeba árĩniguigũ, pahi árĩbiriboñumi ĩgũ.

⁵ I yeba majarã pahia erã mohmerire i yeba maja wihi ta Goãmũ wihi mohmerã árĩtuhajama. Goãmũ wihi gohra ɯmarogue ãhraa. Eropiro Goãmũ wihi i yeba maja wihi ɯmaro maja wihi ìhacũ iira wihi ãhraa. Eropigũ Moise iri wihire i yeba maja wihire ìgũ moaboro coregã Goãmũ õpa arĩpũ ìgũre. “Utãgũgue árìgũ mære yũ ìhmudiro dopa ta yaha wihire õpa iique. Yũhũ dorediro dopa ta yaha wihire queoro iique,” arĩmũripũ Goãmũ ìgũre.

⁶ Dohpaguepũre Jesu pahi árìgũ ìgũre apira mohmeri i yeba majarã pahia mohmeri tauro õaro ãhraa. Bu gohra árĩbeaa. Goãmũ masare “Cristo mera mære õaro iigũra,” ìgũ arĩ apira iribojegue maja doreri Moise doreri tauro õari ãhraa. Marire ìgũ arĩ were apira iri doreri tauro marire õaro árĩcũ iiroca. Eropigũ marire Goãmũ mera amubasagũ árìgũ, Cristopũ gajirã tauro pahi ãhrimi.

⁷ Negohrague Moise dorera mera mari Goãmũ mera õamasibirimũribũ. Iri doreri mera mari õacũ gaji buherire apibiriboñumi Goãmũ. Iri doreri mera mari õacũ, “Cristo mera mære õaro taugũra,” arĩ werebiriboñumi marire.

⁸ Iri dorerire erã bocatĩubirirare weregũ õpa arĩpũ ìgũ yarãre Israe masare:

Õpa arãa yũhũ mũa Opũ: “Õaro peeque. Pũhrũgue gaji buherire weregũra yaharãre Israe masare, Judá ya curu majarã sãre.

⁹ Iri buheri erã ñecũ sũmarãre erãre werepira iro dopa ne árĩsome. Yũ basi erãre Egipto yebague árĩnirãre wiugũ erãre werepiribũ. Yũ

eropa arĩ werepirare tarinugama erã. Erã eropiicũ ãagũ negohrare erãre yũ wererare duhucãbũ.

¹⁰ Eropigũ pũhrugue Israe masare õpa arĩ weregũra: Yũ dorerire erãre guñacũ iigũra. Erãre yũ dorerire yũhriacũ iigũca. Eropigũ yũ Goãmũ erã opũ árĩgũra. Eropirã erãpũ yaharã masa árĩrãcoma, arĩ weregũra.

¹¹ Eropirã irisubure erã mera majarãre erã acawererãre ne erã õpa erã basi game arĩsome: ‘Dohpaguere mari Opũre Goãmũre masique mũa,’ ne arĩ game buhesome. Erã árĩpehrejã yũre masituharãcoma. Majirãgã, mũrã sã yũre masirã dihta árĩrãcoma.

¹² Eropigũ erã ñeri iirare cãdijigũca yũhũ. Eropigũ erãre dipuwaja moasome yũhũ,” arãa yũhũ mũa Opũ, arĩpũ Goãmũ ãgũ ya wereniguiiri erã gojarapũgue.

¹³ Eropa arĩgũ mama buherire apigũ, iribojegue maja dorerire duhucũ iigũ iimi. Eropiro mũra doreri ãgũ duhucũ iira pũhrũ iri doreri mũra gohrotpehrea waro iiaa.

9

I yeba maja taribure umaro maja taribu sãre Goãmũre umupeori taribure werepũ

¹ Negohraguere Goãmũ ãgũ dorerire Moiserere apigũ masa ãgũre umupeoburi sãre werepipũ. Eropigũ Goãmũre erã umupeoburi wihi sãre iidore apipũ.

² Iri wihi waimũrã gasiri wihi árĩyoro. Pe taribu opayoro. Wũari taribu erã ñajamũhtari taribu Goãmũ ya taribu waĩcũyoro. Iri

taribure erã sihãgori yucũ duhpeodigu áriyoro. Eropárĩcũ mesa sã áriyoro. Iri mesa weca Goãmure erã ori pan peyayoro.

³ Gaji taribu suhri mera erã cãhmotara taribu áriyoro. Iri taribu Goãmũ ĩgu áriiri taribu gohra waĩcũyoro.

⁴ Iri taribugue oro mera erã iira mesa, incienso erã soeri mesa áriyoro. Eropiro oro ðari mera erã sũra comoro ero oyayoro. Iri comoro waĩcũyoro Goãmũ arĩ werepira gojara dicũri comoro. Iri comoro pohecague dicũyoro. Yuju coro oro coro dicũyoro. ĩgu masare ejorañegã mana waĩcũriñegã dicũri coro áriyoro. Eropiro iri comoro pohecague Aarõ yagu ĩgu tuadigu pũcũdigu áriyoro. Eropiro pemiji utãmiji Goãmũ ĩgu doreri ĩgu gojatura mijiri iri comoro pohecague dicũyoro.

⁵ Iri comoro weca perã anyua wéanirã áriñorã. Erã wéanirã Goãmũ ĩgu gosesiriri mera, “Iri taribure ĩgu ãhrimi,” arĩ werero iiyoro. Iri comoro buariñe erã quẽdupari mera buasũyoro. Iri comoro buariñe weca masa ñero erã iira dipuwajare cãdijidoregu waimurã di Goãmure erã orare wejêsiripeopũ pahĩ opũ. Iripẽta werẽgura i wihi majare dohpaguere.

⁶ Eropirã iri wihire eropa erã ðaro erã amura pũhrũ pahia umuri nũcũ erã ñajajamũhtari taribu erã mohmerire iimuriñorã.

⁷ Eropigu pahia opũpũ dihta gaji taribuguere ñajapũ. Bojori nũcũ ĩgu iri taribure yujusubu ta ñajapũ ĩgu. Eropa ñajagu erã wejẽdigu waibũgu dire aĩ ñajagu, Goãmure umupeopũ. Iri di mariro ne ñajabiripũ. ĩgu basi ĩgu ñeri

iira wajare, árĩpehrerã gajirã Israe masa erã ñero iira dipuwaja sãre cãdijidoregũ dire aĩ ñaja apimũripũ ĩgũ Goãmũre.

⁸ Árĩpehreri i mera Espĩritu Santo marire õpa arĩ buhebu iimi: Iri wihi Moisere ĩgũ apira wihigue Goãmũre umupeoburi árĩrisubu masapũ Goãmũre umupeorã iri wihigue ñajamasibiriñorã. Pahia opũ dihta Goãmũ ĩgũ árĩri taribu gohraguere ñajamasimi masare serẽbasagũ.

⁹ I árĩpehreri Goãmũre umupeori wihi majare masare apira, marire dohpague majarã buheburi dihta árĩyoro. Pahia erã ñeri dipuwajare waimũrãre wejẽra mera masa ne Goãmũ mera tarimasibiriñorã. Pahia erã eropa soe mujuquerecũ masa erã ñeri erã pepirigue ne pehresũbiriñorã.

¹⁰ Goãmũ Moisere apira doreri deyoro maja iiri dihta ãhraa. Erã õpa baburi, erã õpa ihriburi, erã õpa coeburi, erã õpa iiri dihta árĩyoro. Eropiro iri doreri marire õarã wacũ iibiriyoro. Goãmũ iri dorerire masa erã iiburire apiñumi Cristo ariboro core.

¹¹ Dohpaguere Cristopũ mari pahi opũ árĩgũ arituhadigũ ãhrimi. Eropigũ marire sĩribasara mera marire õarã wacũ iituhadi árĩmi. Eropigũ Goãmũre mari ñeri dipuwajare cóãdoregũ Goãmũ árĩrogue ñajaja i yeba maja taribure ñajabiripũ. Umaro maja wihi ñajapũ. Iri wihi i yeba maja wihi tauro ãhraa. Eropiro masa erã iira wihi árĩbeaa.

¹² Eropigũ Cristo umarogue Goãmũ ĩgũ árĩro gohrague yujusubu ta mari ñeri dipuwajare

ñajatupũ. Eropa ñajagũ cabritoa dire, wecua dire Goãmũ árĩri taribugue erã aĩ ñajaro dopa iibiripũ ĩgũ. ĩgũ basi sĩrigũ ĩgũ di gohrare cóãgũ árĩpehrerinũri Goãmũ mera mari õaro árĩniguicãborore iipũ.

¹³ Ñeri oparãre guhraricũrãre coewearã erãre wejẽsiripeomũriñorã cabritoa di mera, wecua di mera, wecũare erã soera niti mera.

¹⁴ Eropa iĩñorã masa erã dupure ñerire coewea cóarã. Iri tauro Cristopũ ĩgũ di mera mari pepirigue mari ñerire õaro coewea cóãcãdi árĩmi. Iri ñeri dipuwaja oparã peamegue wabonirã árĩribũ mari. Jesucristopũ ñeri marigũ árĩgũ ta ĩgũ basi crusague sĩrigũ Goãmũre ópũ. Espĩritu Santo eropa árĩniguigũ ĩgũ itamuri mera eropa ópũ ĩgũ ĩgũ basi. Eropigũ ĩgũ mari ñerire ĩgũ coeweadĩ árĩmi, Goãmũ ojocarigũ ya árĩburire mari õaro iimasiboro dopa.

¹⁵ Eropigũ “Õpa mũare õaro iigura,” Goãmũ arĩ ĩgũ mama werepidiro dopa ta Cristopũ iidigũ árĩmi. Eropa iidi árĩmi ĩgũ Goãmũ ĩgũ beyenirãre taubu. ĩgũ eropa taucũ árĩpehrerinũri ĩgũ mera õaro árĩrãca mari ĩgũ yarã. Eropirã Goãmũ ĩgũ yarãre ĩgũ oburire oparãca mari. Moise doreri dihta árĩcũ masa erã ñeri iira dipuwajacũrã árĩmũriñorã dohpa. Eropa ñeri iira dipuwajacũrãre taubu ĩgũ crusague sĩribasadi árĩmi. ĩgũ eropa sĩricũ mari ĩgũ yarãre ĩgũ oburire oparãca.

¹⁶⁻¹⁷ Õpa ãhraa mari masare. Yujugũ ĩgũ sĩriboro core ĩgũ acawererã ĩgũ yare aĩ guere-

masibeama. Eropiro ĩḡu oparire ĩḡu acawer-eräre ĩḡu oburire ĩḡu gojatuyurapũ ĩḡu sĭriboro core iripũ wajacubeaa dohpa. ĩḡu sĭricũ ĩarã iripũ ĩḡu arĭ gojadiro dopa ta ĩḡu yare guer-erãcoma erã.

¹⁸ Eropa ta Goãmũ masare werepimũhtara Moiserẽ ĩḡu apira doreri sĭriro mariro di cóãro mariro ne duhpihuri árĭbiriyo-ro. Eropiḡu waibũḡu dire Moise wejẽsirira pũhrũ ĩḡu dorerire diaye ta iḡu iipũ.

¹⁹ Eropiḡu õpa iimũhtapũ Moise: Goãmũ ĩḡu apira dorerire masare werepehopũ. Pũhrũ cabritoa dire, wecũa dire deco mera morepũ. Eropiḡu isopo waĩcũdigũ dũpũ mera oveja poari diari poari mera erã ñimurare turãpũ. Iri dũpũ mera dire yosogũ, Goãmũ dorerire ĩḡu gojarapũ weca wejẽsiripũ. Árĭpehrerã masa weca sãre wejẽsiripeopũ.

²⁰ Eropa iḡu õpa arĭpũ ĩḡu: “Goãmũ marire ĩḡu werepira ĩḡu dorera i di mera iri diaye árĭcũ masia mari. I dire ĩarã diaye ta ĩḡu arĭdiro dopa ta ĩḡu marire iiburire masia. Maripũre irire yũhridoremi,” arĭpũ Moise.

²¹ Eropiḡu masare ĩḡu iidiro dopa ta Goãmũ umupeori wihi waimũrã gasiri wihire, árĭpehreri iri wihi árĭri sãre wejẽsiripeopũ.

²² Eropa ta ãhraa. ĩḡu doreri iri dorediro dopa ta baja ñerire di mera coeweadoreyo-ro. Eropiḡu di cohoro mariro Goãmũ mari ñeri iirare ne cãdijisome.

Cristo ĩḡu dire cóãḡũ, ĩḡu yarã erã ñeri iirare coeweapũ

23 Eropiro i yeba maja wihire, iri wihi árĩri sãre ñerire coewearo dopa ta waimurã di mera wejẽsiripeomuripũ. Eropiro iri tauro umarogue wamorãre erã ñeri dipuwaja oparare coero gahmea. Eropiro waimurã di tauro árĩgũ ya di mera erã ñerire coero gahmea. Eropirã Jesucristo ya di mera coenirã wabũ maripũ.

24 Eropigũ Cristo mari ñeri iira dipuwajare Goãmure cóãdoregũ Goãmure erã umupeori wihi masa erã iira wihire ñajabiripũ. I yeba maja wihi umaro maja wihi ñhacũ iira wihi ãhraa. Goãmũ ya wihi gohra umaro maja wihi ãhraa. Eropigũ mari ñeri iira dipuwajare cóãdoregũ Goãmũ árĩro gohrague ñajapũ Cristo. Umarogue wapũ ĩgũ Goãmũ core mari ya árĩburire serẽbasabu.

25 Pahia opũ bojori nũcũ Goãmũ ĩgũ árĩri taribugue erã ñeri iira dipuwajare cóãdoregũ ñajamuripũ waimurã di mera. Cristopũ sĩrigũ ĩgũ dire cóãdigũ Goãmure mari ñeri iira dipuwajare cóãdoregũ erã iiro dopa bajasuburi ñajabiripũ.

26 Bajasuburi ĩgũ dire cóãbu árĩgũ, i yeba árĩropẽ bajasuburi ĩgũ ñero sĩriniguicãboñumi. Yujusubu ta dehyoapũ ĩgũ i yebaguere i umũ pehrerinũ coregã. ĩgũ dehyoagũ ĩgũ yujusubu ta sĩribasara mera mari árĩpehrerã ñeri iirare cóãbu dehyoapũ.

27 Árĩpehrerã mari masa sã yujusubu ta sĩrirãca. Mari eropa sĩrira pũhrũ, òarãre, ñerã sãre beyegũcumĩ Goãmũ.

28 Yujusubu ta mari sĩriro dopa ta Cristo sã

yujusubu ta sīripu bajarã masa erã ñero iirare cóãbu. Puhru dipaturi dujarigucumi. Mari ñerire cóãdigugue dujarigucumi. Eropigu irire dipaturi cóãgu arisome. Eropa arigu mucubiriri mera igure corerãre taugu arigucumi. Igu pohrogue erãre aigãbu arigucumi.

10

¹ Moise doreri puhru Cristo masare igu ñaro iiburire ihmura dihta árĩbu. Eropiro Cristo masare erã ñeri iirare ñaro cóãboro dopa iri doreri erã ñerire cóãmasibiriyoro dohpa. Eropiro iri doreri iri iidorero dopa ta pahia bojori nucu Goãmure waimurãre wejẽ, soe muju, iiniguquerecũ masa erã ñerire cóãmasibiriyoro. Goãmure umupeomorãre ñarã árĩcũ iimasibiriyoro iri doreri.

² Iri mera masa erã ñerire cóãcũ, yujusubu ta Goãmure erã waimurã wejẽ di cóãra puhru erã ñerire cóãpehosũboñuma. Eropirã irisubu majarã, “Dipuwaja mara guare,” arĩ pepiboñuma masa. Eropirã iripẽta dipaturi Goãmure waimurã wejẽburire duhucãboñuma.

³ Ñabirimuriñorã dohpa. Eropirã bojori nucu Goãmure waimurãre wejẽ di cóãcũ masa erã ñeri dipuwajare guñaniguicãñorã.

⁴ Wecua di mera, cabritoa di mera ne mari ñeri dipuwajare cóãmasiya mariyoro dohpa.

⁵ Iri eropa árĩcũ ñagu Cristo i yebaguere igu ariboro core ñpa arĩpu Goãmure igu Pagure: Waimurãre erã soe muju ocũ, trigo pogare erã ocũ sãre mu ñagu ñhasuabeaa mũhu. Eropigu masa dehyoacũ iibu mũhu yure.

Muhũ yũre iira dũpũ mũre mucubiricũ yũ iiburi dũpũ áríroca.

⁶ Ñerire erã cóãborore waimũrãre wejẽ erã soe mujucũ ãagũ ãhasũabirabũ mũhũ.

⁷ Mũ eropa ãhasũabiricũ ãagũ õpa arĩbũ mũre: “Mũ gamerire yebague iigũ wagũra. Yũ eropi-iburire arĩ gojara áhraa mũ yare erã go-jarapũgue,” arĩbũ yũhũ, arĩmũripũ Cristo ãgũ Pagũre.

⁸ Negohraguere Goãmũ ãgũ doreri waimũrãre trigo poga sãre erã ori mera erã ãgũre umu-peodorequerecũ ta õpa arĩpũ Cristo ãgũre. “Waimũrãre soe muju erã ocũ, trigo pogare erã ocũ sãre gamebiribũ mũhũ,” arĩpũ ãgũ.

⁹ Eropa arĩtuhagũ õpa arĩnemopũ: “Mũ gamerire yebague iigũ wagũra,” arĩpũ. ãgũ eroparĩcũ õpa masia mari. Iribojegue Goãmũre erã ñerire cóãdorerã waimũrãre wejẽ di cóãrare gohrotogũ iipũ Goãmũ. Eropa gohrotogũ Cristo ãgũ sĩridiro mera masare erã ñeri dipuwajare taugũcumĩ Goãmũ.

¹⁰ Jesucristo ãgũ dũpũre ogũ sĩrigũ arĩpehrerã mari ñero iirare cóãdigũ arĩmĩ. Yujusubu ta Goãmũre ãgũ dũpũre ogũ marire dipuwaja maricũ iidi arĩmĩ. Eropa iigũ Goãmũ ãgũ gamediro dopa ta iidi arĩmĩ.

¹¹ Arĩpehrerã pahia umũri nũcũ Goãmũre umupeori wihi mohmeniguima. Eropa mohmeniguirã mũraro ta waimũrãre wejẽ soe mujuma Goãmũre masa ñerire cãdijidoremorã. Erã eropa iiquerecũ ta erã ñero iirire cãdijibeamĩ ãgũ.

12 Cristopu yujusubu ta mari ñeri dipuwajare sīrigu, mari ñero iirare òaro cādijipehocãcũ iidigu árīmi. Irire cādijipehocũ iituha waha wapu ĩgu Pagu pohrogue ĩgu diayepu doagu wagu. Opu árīgu erogue doacumi.

13 Eroguere doagu coregu iimi. ĩgure ĩhaturirãre ĩgu Pagu ĩgu tarinugabasaborore coregu iimi.

14 Yujusubu ta ĩgu sīridiro mera ĩgu coenirãre òarã ñeri mariro erã árīniguicũ iidi árīmi. Eropigu Goãmu pohro doami pare.

15 Jesucristo eropa iiboro core erã arĩ gojamuhtarare arĩ weremi Espiritu Santo marire. Ōpa arĩ weremi ĩgu:

16 Ōpa arĩmi mari Opu: “Pũhrũguere ōpa arĩ weregura Israe masare. ‘Yu dorerire erã yũhridiacũ iigu erã pepirigue apigura,’ arĩ weregura,” arĩmi ĩgu.

17 Ōpa arĩnemomi Goãmu: “Erã ñero iirare dipaturi guñanemosome yũhũ,” arĩmi ĩgu, arĩ weremi marire Espiritu Santo Goãmu yare gojarapũgue.

18 Mari ñeri iirare ĩgu cādijicũ dipaturi mari ñeri dipuwajare sīribure gamebeaa mari.

Goãmu pohro mari ejaro dopa ta ĩgu mera gũiro mariro mari wereniguimasia

19 Cristo ĩgu sīriro mera ĩgu di cóãro mera mari sã dohpaguere gũiro mariro Goãmu mera wereniguimasia. Eropirã ĩgure serẽmasia.

20 Iribojegue Goãmu ĩgu árĩri taribugue Goãmure serẽbu pahia opu dihta ñajamasimi. Iri taribure Goãmu árĩrore cãhmotara suhrĩrore

ĩḡu dihta tari ñaja serẽmasimi. Dohpague ta mari basi Goãmũ árĩro ñajaro dopa ta Goãmũre serẽmasia. Pahia opu ĩḡu iri taribugue ĩḡu dire aĩ ñajaro dopa ta Cristopũ Goãmũ pohrogue ejapũ mari ñeri iirare cãdijidoreḡu ejagũ. Eropa iĩḡu Goãmũ mera mari werenigui-bodirore cãhmotadirore cóãdi árĩmi.

²¹ Goãmũ pohrogue serẽbasagũ mari Goãmũ yarã yagũ pahia opu turatariagũ àhrimi Jesu-cristo.

²² Eropirã, yũ acawererã, Cristo mari pahia opu árĩcũ ĩha mari Goãmũ mera werenigu-imasirã árĩrã Goãmũre serẽrã. Diaye pepirã árĩrã, “Ĩḡu yãhrigucumi,” arĩ umupearã ĩḡure serẽrã. Cristo mari ñerire ĩḡu di mera coenirã àhraa. Eropirã “Dipuwajacũrã àhraa,” arĩ pepirã árĩbeaa mari. Eropirã ḡũhrari mariri deco mera coeweasũnirã iro dopa àhraa. Eropa árĩrã Goãmũre serẽrã.

²³ “Mũare taugũra,” ĩḡu arĩdiro dopa ta iĩḡucumi. Eropirã ĩḡu marire ĩḡu tauboro òaro mucubirimũhtayua mari. Irire mucubirimũhtayurã ne cãdijibiricãrã. Goãmũre eropa ḡũñaturaniguicãrã. Eropa ḡũñaturarã irire gajirãre wererã mari.

²⁴ Mari mera majarãre mahirã itamurã mari árĩpehrerã mari game mahi mari itamuboro dopa.

²⁵ Eropirã òaro gamenererã Goãmũre umupearã. Gajirãpũ gamenerebeama Goãmũ yare buhemorã. Erã iiro dopa iibiricãrã. Mari mera majarãre Jesucristore umupeonemocũ iirã. I yebaguere mari Opu ĩḡu dujariboro merogã

duhyaa. Irire masirã turaro itamurã mari mera majarãre, Jesu yarãre erã Jesucristore umupe-orire.

²⁶ Diaye árĩri buherire mari masiquererã ta irire cóãrã ñerire mari eropa iiniguicũ, Jesucristo sĩrira mera mari ñerire cóãnemoboro ne mara.

²⁷ Eropiro eropa iirãre guhyaro dujaa. Árĩpehrerã ĩgure ĩhaturirãre dipuwaja moagu turaro ũjurogue cóãgucumi Goãmũ erãre. Eropirã ĩgu dipuwaja moaborore güirã dihta ãhrima ĩgu yare cóãnirã.

²⁸ Moise dorerire tarinũganirãre dipuwaja moarã erãre wejẽmuriñorã. Ne mojomoro ĩaro mariro wejẽmuriñorã erãre. Ũrerã erã ñero iirare weresãcũ peerã erã tarinũgarare masima. Ũrerã maricũ perã erã ñero iirare weresãcũ peerã erãre wejẽmuriñorã Goãmũ dorero dopa ta.

²⁹ Erã iidiro tauro Goãmũ magure ĩhaturirã dipuwaja moasũmorã árĩrãcoma. Cristo ĩgu di cóãro mera marire mari ñeri iirare cóãdi árĩmi Goãmũ. ĩgu eropa cóãborore wereyupũ ĩgu. Eropirã ĩgu cóãnirã erã árĩquererã ta, puhũ ĩgu di cóãrãre “Bu gohra ãhraa,” arĩrã ĩgu dipuwaja moamorã gohra árĩrã ta iirãcoma. Eropa árĩrã Espĩritu Santore ñero arĩ wereniguirã ãhrima. ĩgu erãre mahigu ãhrimi. Erã eropa ñero wereniguicũ ĩagu turaro dipuwaja moagucumi Goãmũ erãre.

³⁰ Goãmũ eropa iigu árĩgure masia. Goãmũ ĩgu basi ta õpa arĩpũ: “Yũhũ ãhraa dipuwaja moabu. Erã ñerire iira dipuwaja, dipuwaja

moagura yũhũ,” arĩpũ ãgu. Õpa arĩnemopũ: “Yaharãre ñero iirãre dipuwaja moagura,” arĩpũ ãgu, arĩ gojañuma ãgu yare gojarapũgue.

³¹ Goãmũ ojocarigũ marire dipuwaja moacũ gũhyataria.

³² Iribojegue mũa árĩrare guñaque mũa. Irisubure Goãmũ yare ne masinagarã ñero tariquererã bajasuburi ñero tariquererã ne ãgu yare cóãbiribũ mũa.

³³ Yujuyerisuburi masa erã ãhuro gajirã mũare ñero arĩ, ñero pabirama mũare. Eropirã gajirã Jesu yarãre erã ñero iicũ ãarã erãre mojomoro ãabũ mũa.

³⁴ Erã Cristo yarã erã árĩra waja erã peresugue árĩrãre mojomoro ãabũ mũa. Eropirã mũa yare erã emaquerecũ ta mucubiriri mera “Õaroca,” arĩmũribũ mũa. I yeba maja tauro õarire umaroguere mũa opaburire masimũribũ. Iri õari pehrebiriborore masibũ mũa. Irire masirã mũa oparire erã emacũ bũjawerebiribũ mũa.

³⁵ Eropirã irire guñatura duhubiricãque. Goãmũre eropa umupeoniguicãque. Mũa eropa iira waja mũare õaro iigũcumĩ.

³⁶ Goãmũ yare õaro iiniguicãro gahmea ne duhuro mariro. Goãmũ yare iirã bocatũuro gahmea. Eropa iirã árĩrã ãgu gamerire mũa iira pũhrũ ãgu “Mũare õpa ogura,” ãgu arĩ apirare oparãca.

³⁷ Õpa ãhraa Goãmũ yare erã gojarapũgue: Merogã duh, ñero pabirama mũare. Eropiryaa Cristo ãgu eraboro. Eropa eragũ mata erapurumujugũcumĩ.

38 Yaharã ðarãpũ yũre umupeoniguicãrãcoma. Eropirã yaharã árĩniguicãrãcoma. Yũ mera eropa árĩniguirãcoma. Yahare cóãnirãpũre ìhasuasome yũhũ, arĩmi Goãmũ, arĩ gojañuma.

39 Maripũ Goãmũ yare cóãrã árĩbeaa mari. Eropirã peamegue wamorã árĩbeaa mari. Goãmũre umupeoa mari. Eropirã ìgũ taunirã ãhraa ìgũ pohro wamorã.

11

Umupeorire wererũ

1 Òpa ãhraa umupeori: Goãmũre umupeorã, marire ìgũ ðaro iiburire ðaro masia. Ìgũre ìabiriquererã ìgũre umupeorã “Diaye ta iigũ ãhrimi,” arĩ pepia mari.

2 Iribojegue majarã Goãmũre “Diaye ta iigũ ãhrimi,” erã arĩ umupeocũ ìagũ ìhasũapũ Goãmũpũ.

3 Goãmũ ìgũ wereniguiri mera árĩpehrerire ìhacũnugupũ. Eropigũ ìgũ mari ìabirirare árĩpehrerire mari dohpague mari ìari sãre ìhacũnugupũ. Irire mari ðaro masia Goãmũre umupeorã.

4 Goãmũre umupeogũ Abelpũ cordero wejẽ, soe mujupũ Goãmũre umupeogũ. Eropa iigũ ìgũ ìgũ tauro ðaro umupeopũ ìgũ Goãmũre. Eropigũ Goãmũ ìgũ orare mucubiripũ. Eropa mucubirigũ “Òagũ ãhrimi,” arĩ ìapũ ìgũ Abelre Goãmũre umupeogũre. Abel iribojegue sĩridigũ mũrũ árĩquerecũ ìgũ Goãmũre eropa ii umupe-orare guñaa mari sã. Eropa guñarã. Goãmũre umupeoa mari sã.

⁵ Enoco Goãmure ïgu umupeocũ ïagu mucubirimuripũ Goãmũ. Eropa mucubirigu ïgure ïgu pohrogue aĩmuriarũ. Eropa ta werea Goãmũ yare wereniguirire erã gojarapũgue. ïgu eropa aĩmuriara pũhrũ masa ïgure ne bocabiriñorã. ïgu eropa aĩmuriadigu árĩgu ne sĩribiripũ.

⁶ Goãmure umupeobirã ïgure mucubiricũ iimasibea mari. Goãmure serẽdiarã õpa ïgure arĩ pepiro gahmea marire. “Diaye ta ïgu Goãmũ gohra ãhrimi. Eropigu ïgure mari umupeocũ marire õaro iimi ïgu,” arĩ pepiro gahmea. Mari eropa arĩ pepibirã mari ïgure serẽmasibea.

⁷ Noé Goãmure umupeogu ïgure ïgu wererare õaro yũhripũ. Pũhrũ erã ñero waborore Goãmũ ïgure werecũ peegu õaro yũhripũ ïgu. Eropa yũhrigu wuadiru dohodiru iipũ ïgu acawererã dia miririñere tarimorã. Noé eropa umupeogu árĩgu i yeba majarã ñerã erã umupeobirirare, erã taribiriboro sãre ïhmuçu iimuripũ. Eropigu ïgu umupeocũ ïagu “Õagu ãhrimi,” arĩ ïamuripũ Goãmũ ïgure.

⁸ Abrahã sã Goãmure umupeogu ïgure yũhripũ. Gaji yebaguere ïgure ïgu oburi yebaguere Goãmũ ïgure wadocẽ ïgure yũhripũ. ïgu ya yebare wirigãgu ïgu masibiriri yebague ejarũ.

⁹ “I yebare mure ogura,” Goãmũ ïgu arĩcũ peegu ïgure umupeogu iri yebague eja arĩmerezarũ ïgu. Ero arĩmerezajerẽgu ïgu gaji yeba majagu árĩro dopa waimurã gasiri wiri mera wihicũ curimuripũ murano árĩbirinijagu árĩgu. ïgu magu Isaa sã ïgu pãrami Jacobo sã

ĩgu iiro dopa ta iimuriñorã. “Mũare i yebare ogũra,” arĩ weremuriřu Goãmũ erã sãre.

¹⁰ Eropigu i yebare curigu macari iibirimuriřu Abrahã. Gaji macague Goãmũ ĩgu arĩri macague umarogue ĩgu waborore coregu iipu Abrahã. Iri maca Goãmũ iira macaũ. Eropigu ĩgu umupeocũ ĩ arĩyoro. Eropigu iri macare ne pehrebiriburi macare coregu iipu.

¹¹ Goãmũre umupeogo Sara waĩcuřo, buro gohra arĩquerego porã marigo arĩquerego ta porãcũpo. “Goãmũ ĩgu arĩdiro dopa ta iigucumi,” arĩgo ĩgũre umupeogo porãcũpo.

¹² Eropigu Abrahã buřu gohra arĩqueregu ta porãcũřu. Eropirã ĩgu pãramerã arĩturiarãgue bajarã wacãñorã. Necãre, imipa yerire mari queorã yujuro bojeya mariro dopa ta, ĩgu pãramerã arĩturiarã sãre queo bocatũya mariñorã.

¹³ Arĩpehrerã oã yũ werenirã murague Goãmũre umupeotuhajanirãgue sĩriñorã. Goãmũ “Mũare ogũra,” ĩgu arĩrare opanibirãgue sĩriñorã. Eropa opabiriquererã “Goãmũ ĩgu arĩdiro dopa ta puhrũgue ogucumi guare,” arĩ masiñorã. Eropa masirã mucubirimũhtañorã. Eropirã õpa arĩñorã erã: “I yebague curirã ãhraa. Gaji yeba majarã ãhraa,” arĩmuriñorã erã.

¹⁴ Eropa arĩrã gaji yebare erã ya yeba arĩborore corerã iĩñorã. Irire õaro masia mari.

¹⁵ “Gaji yeba majarã ãhraa,” erã arĩrã iribojegue erã cóãra yebare guñarã iibiriñorã. Iri yebague dujaa wadiarã dujaa waboñuma.

16 Õari yebapure gahme corerã iĩñorã. Iri yeba umarogue ãhraa. Erã eropa gahme corecũ ãagu Goãmure “Gua opa ãhrimi,” erã arĩcũ peegu ne guhyasĩribiripu Goãmũ. Ìgu pohro erã ya maca árĩborore iibasatuhadi árĩmi Ìgu. Eropigu guhyasĩribiripu.

17-18 Goãmũ Abrahãre Ìgu magure Isaare wejẽ soe mujodorepu. Ìgure ãadiagu eropa dorepu, “¿Diaye ta yure umupeori?” arĩgu. Eropigu Goãmure umupeogu Ìgu arĩdiro dopa ta iiripu Abrahã. “Mũ magu Isaa mera mũ pãamerã árĩturiarãre opaguca mũhũ,” Goãmũ Ìgu arĩdiro árĩquerecũ Ìgu magure wejẽbu iiripu Goãmũ dorero dopa ta.

19 “Yu magure Isaare yu wejẽcũ Goãmũ Ìgure masugucumi,” arĩ pepigu Ìgure wejẽbu iiripu. Eropigu Goãmũ Ìgure cãhmota Ìgure wejẽdorebiripu. Ìgu pagu Ìgu eropa wejẽbu arĩgu Isaa sĩribudigu arĩpu. Eropigu sĩridi masadigu iro dopa arĩpu Ìgu. Eropigu Abrahã Ìgure ojocarigu dipaturi opapu Ìgure.

20 Isaa Goãmure umupeogu Ìgu porãre Jacobore, Esaú sãre “Pũhrugue Goãmũ mũare õaro iigucumi,” arĩpu.

21 Goãmure umupeogu Jacobo Ìgu sĩriboro coregã wahgãnugaja Ìgu tuadigu mera tuañanugaja Goãmure serẽ umupeopu. Eropa serẽgu José porãre umare “Goãmũ mũare õaro iigucumi,” arĩpu Jacobo.

22 Goãmure umupeogu José Ìgu sĩriboro coregã Israe masa Egipto arĩrã erã wiriaborore weremũhtarpu. Eropa erã wiriaborore masiyugu

ĩḡu sĩrira dupu murarore aĩḡadorepu ĩḡu porãre.

23 Goãmure umupeorã urerã abe gohra Moiserere dibuñorã ĩḡu pagu samarã ĩḡu masa dehyoara puhru. Oagugã ĩḡu árĩcũ ĩarã ĩḡugãre dibuñorã. Iri yeba majagu tauro árĩḡu opu ĩḡu majirãre wejedorerire tarinugarã ĩḡure dibuñorã erã. Erã erã opure güibiriñorã.

24 Moiserere masudigo i yeba majarã opu mago árĩpo. Eropa igo masudigu árĩquereḡu, Goãmure umupeogu “Opu mago magu aħrimi,” erã arĩ piyucũ gamebiripu ĩḡu Moise. Oparã mera majagu árĩdiabigu Goãmũ yarã mera jagu árĩdiaru.

25 Goãmure tarinugadiagu árĩḡu ĩḡure masudigo pohrogue bajamenurigã õaro árĩboñumi. Eropa õaro árĩbu árĩquereḡu ĩḡu Goãmũ yarã mera ñero taridiaru.

26 Eropigu Egipto majarã ya õarire tauro Cristo ya árĩburire ñero tariburire gamepu. Puhrugue Goãmũ ĩḡure ĩḡu õarire oborore masigu ñero taridiaru.

27 Goãmure umupeogu Egipto majagu tauro opu, ĩḡu mera ĩḡu guacũ güibiripu. Eropa güibigu iri yeba árĩdigu iri yebare cóacã waha waru. Goãmure ĩabiriquereḡu “Goãmũ árĩcumi,” arĩ pepipu ĩḡu. Eropigu ĩḡu iiborore ne duhubiripu.

28 Goãmure umupeogu Moise Israe masare Goãmũ ĩḡu tauborore masipu. Eropa masigu Goãmũ ĩḡu dorediro dopa ta Israe masa erã disipororire erã tura mijirire di mera wejēsiri

tuhdorepũ. Eropa dorepũ anyu masare wejẽgu erã masa tĩrãre wejẽbodigu Israe masa erã masa tĩrãre wejẽbiriboro dopa.

²⁹ Goãmũre umupeorã Israe masa deco diariya waĩcũriya deco watope árĩri maha deco mariri maha taribujañorã. Erã eropa taribujacũ ãarã Egipto majarãpũ erãre nũrusiarã erãre ãhacũ taribujanirã miri sĩria wañorã.

³⁰ Goãmũre umupeorã Israe masa Jericó maca sãriro, wũari sãriro pũrupũ majisora curiñorã. Siete nũri gohra iri macare majisora curiñorã erã. Iri nũcũ nũri erã majisorara pũhrũ iri sãriropũ dijapehrea wayoro.

³¹ Iri maca majago ũa mera ñero iidigo Rahab waĩcũgo Goãmũre umupeogo Israe masare itamupo. Iri macare erã cóãboro core bajamerãgã Israe masa erogue erã ñaja duhricũ ãha igo erãre itamupo. Eropirã Israe masa iri maca majarãre Goãmũre tarinũganirãre wejẽpehoquererã ta igopũre wejẽbiriñorã.

³² Gajirãre Goãmũre umupeonirãre werenemoboya yũhũ. Eropa werediaqueregu ta bajarãre eropa Goãmũre umupeorã sãre were gojapehomasibirica yũhũ. Gedeõ, Baraca, Sansõ, Jefté, Davi, Samue, Goãmũ yare weremuhtanirã sã árĩpehrerã yũ werebonirã ãhrima.

³³ Goãmũre umupeorã yujurãyeri gaji yebarigue árĩri macari majarãre gamewejẽ tarinũgañorã. Eropirã gajirã diaye dorenirã árĩñorã. Gajirã Goãmũ erãre “Mũare itamugura,” ãgu arĩdiro dopa ta ãgu itamurire bocañorã. Eropa ãgũre umupeorã yeea erãre badiacũ erãre erã babiricũ iĩñorã erã.

34 Turaro ũjuri peameri árĩquerecũ ta ũjubiriñorã erã Goãmure umupeonijarã. Gajirã erãre ñose wejēdiacũ duhrigã wañorã erã Goãmure umupeorã. Turabirã árĩquererã Goãmure umupeo, turarã wañorã. “Goãmure umupeorã ãhraa. Gamewejẽ turarã ãhraa,” eropa arĩrã árĩcũ gaji yebari majarã surara erã wejẽrã arirã ne yujuro bojebiriñorã.

35 Goãmure erã umupeocũ ãga yujurãyeri nome erã acawererã sĩricũ ãga Goãmupũ erãre masupũ.

Gajirãpure “Goãmure gamebircãque,” erã arĩ peresu iicũ erãpũ Goãmure duhudiabiriñorã. “Mũa Goãmure duhucũ mũare taurãca,” arĩñorã erãre. Erãpũ duhubiriñorã Goãmũ mera erã õaro masaborore gamerã. Eropirã erãre erã ñero iicũ sĩria wañorã.

36 Gajirãre Goãmure umupeorãre ñero arĩ wereya erãre tãramuriñorã. Eropirã gajirãre guburire, mojotorire diricãa peresu iĩñorã.

37 Goãmure umupeorãre ñerã utã mera dea wejẽmuriñorã. Gajirãre erã dupure seroti mera wiritamuriñorã. Gajirãre ñoserimijiri mera ñose wejẽmuriñorã. Erãre Cristore cóãdorerã erã ñero iimuriñorã. Gajirã erãre ñero iicũ oveja gasiri mera, cabra gasiri mera suhricurã mojomorocurã árĩmuriñorã.

38 Erã õatararã erã árĩcũ i yeba majarã ñerã erã mera majarã árĩbonirã árĩbeama. Wiri marirã arĩrã, masa marirogue utã yucugue árĩgãri siaricãmuriñorã. Eropa árĩgãri siarirã utã yucugue árĩri goberigue, yebague árĩri guberi sãre carĩgãri siaricãmuriñorã.

39 Oã árĩpehrerã Goãmure erã umupeocũ ïagu mucubiripũ ïgu. “Õaro iiabũ mũa,” arĩpũ. Erã eropa õaro umupeoquerecũ Goãmũ erãre “Mũare taugũra,” ïgu arĩdiro ejanibiriya dohra.

40 Õpa arĩ pepirũ Goãmũ: “Oãre yaharãre, pũhrũgue árĩrã yaharã mera yujuro mera taugũra,” arĩ pepirũ. ïgu eropa arĩ pepidiro dopa ta iigũcumi. ïgu eropiicũ õatariaro árĩroca ero core ïgu iidiro tauro.

12

Jesure eropa umupeoniguicãrã mari

1 Eropirã oãre yũ werenirãre bajarã Goãmure umupeonirãre, ñerire iibirinirãre masirã árĩpehreri ñero iirire duhucãrã mari sã. Õpa ãhraa mari queoriñe mera werecũ: Nũcũrire opagũ omari masũ turaro omamasibeami. Eropa ta mari Goãmũ gamerire iimasibea mari ñerire iicũ. Eropirã irire duhucãrã mari. Eropirã Goãmũ ïgu gamero dopa ta õarire iiniguicãrã.

2 Eropirã Jesure eropa guñaniguirã. ïgu ta ãhrimi marire umupeo guñaturacũ iigu. Eropigũ marire umupeonemocũ sãre iimi ïgu. Crusague sĩrigũ yujuro bojerũ. Pũhrũ ïgu mucubiriborore masigũ crusague sĩripũ. Eropa sĩrigũ guhyasĩribodigũ árĩqueregu guhyasĩribiripũ ïgu. Eropa iira pũhrũ dohpaguere Goãmũ ïgu opu ïgu doaro diayerũ doanijagũ ïgu dorebu iimi.

3 Ñerã masa ïgure ñero erã iicũ yujuro bojerũ ïgu. ïgu eropa iidigũre guñaque mũa, mũa sã

ñero tarirã “Yujuro bojebiriboca,” arĩrã. Irire guñaque mũa ãgũre umupeo duhuri arĩrã.

⁴ Ñerire mũa tarinũgaboro dopa Jesu iro dopa ñetariaro gohra tarinibea mũa. Ñerã mũare wejẽnibeama.

⁵ ¿Goãmũ mũare ãgũ porãre ãgũ wererare cãdijicãri mũa? Õpa arĩpũ ãgũ:

Yũ magũ, yũhũ mũre werecũ eropa pepicãbita.

Yũhũ mũre turicũ peegũ bũjawerebita.

⁶ Árĩpehrerã yũ mahirãre werea. Eropigũ árĩpehrerã “Yũ porã ãhraa mũa,” yũ arĩ ãarãre tarinũgadorebeaa. Eropigũ erã tarinũgacũ ãha erãre yũ porãre merogã dipuwaja moaa, arĩpũ Goãmũ.

⁷ Nero tarirã yujuro bojeque “Goãmũ yũre weregũ iimi,” arĩrã. ãgũ yare duhubiricãque. Goãmũ mũare ãgũ porãre merogã dipuwaja moagũ iimi. Erã pagũ sũmarã erã porãre eropa werema. Eropirã erãre dipuwaja moama. Eropa ta iimi Goãmũ sã marire ãgũ porãre.

⁸ Goãmũ árĩpehrerãre weremi. Goãmũ mũare ãgũ werebircũ ãgũ porã gohra árĩbeaa mũa. Eropirã ãgũ porã árĩbirã yujugũ majigũ ãgũ pagũre ãgũ masibiro dopa ta ãgũ weresũya marigũ árĩro dopa ta ãhraa mũa. Eropirã Goãmũre “Yũ pagũ gohra ãhrimi,” arĩmasibea mũa ãgũ mũare werebircũ.

⁹ Mari pagũ sũmarã marire erã werecũ peerã erãre umupeoa mari. Mari pagũ sũmarãre mari umupeoro tauro umupeoro gahmea mari Pagũ Goãmũ ãgũ werecũ. Eropirã ãgũre yũhriro gahmea marire. Eropa yũhrirã árĩpehrerinũri

ĩḡu mera árĩrãca.

¹⁰ Bajamenurigã mari pagu sumarã erã gamero dopa marire were dipuwaja moama. Goãmuru marire õaro weremi. Eropigu ĩḡu masiri mera marire dipuwaja moami marire õarã masadoregu. Eropa iimi ĩḡu marire ĩḡu iro dopa õarã mari árĩboro dopa.

¹¹ Marire ĩḡu dipuwaja moacũ mucubiribea mari. Mari bu bujawerea. Eropa bujawerequererã ta ĩḡu eropa dipuwaja moara puhru õarã árĩrãca mari. Eropirã ĩḡu wererire peenirã árĩrã gajiropa iiro mariro õaro árĩrãca.

Goãmuru marire ĩḡu dorerire mari yuhribiricũ guhya ahraa marire

¹² Eropirã guñaturabirã árĩquererã ta Goãmure õaro guñaturarã árĩque. ĩḡure duhubiricãque.

¹³ Õaro diaye maja mare mua waro dopa ta pee gorowerero mariro õaro diaye ta Goãmure yuhrique. Mua eropiicũ ĩhacũrã gajirã Jesu yarã gajiropa árĩrire iisome. Eropirã turabirã turarã warãcoma.

¹⁴ Árĩpehrerã masa mera õaro árĩque gamequeãro mariro. Eropirã ñero iibiricãque. Ñeri marirã dihta mari Opu Cristore ĩarãcoma.

¹⁵ Õaro iique mua. Goãmuru muare ĩḡu itamucũ õaro yuhrique. Ñeri tiari iri oterire iri gorowero dopa ta mua sã Cristo yare duhu ñerire guñaniguibiricãque gajirãre gorowori arĩrã.

¹⁶ Ne nome mera ñero iirã árĩbiricãque. Eropirã Goãmuru yare gamebirã árĩbiricãque.

Eropa árĩgu árĩpu Esaú. Ĩgu masa tĩgu árĩripu. Eropigu ĩgu pagu yare ĩgu sĩrira puhrũ opabu árĩripu. Eropa árĩqueregu yujunũ barire gametarigu iri bari mera ĩgu pagu magure ĩgu tĩgu opaborore bu gohrotopu.

17 Puhrũ ĩgure warare masia mũa. Ĩgu eropiira puhrũ ĩgu pagu ĩgure Esaũre ðaro árĩdoreburire Goãmure serẽbasarire turaro gameripu daja Esaúpũ. Ĩgu eropa gamequerecũ ta ĩgu pagu magupure ĩgu tĩgu opaburire gohrotora dipuwaja ĩgjiropa árĩrire iisome. Eropirũ pagu ĩgure obiripu. Eropa gamegu turaro orequeregu ĩgu pagure serẽqueregu irire opamasi-biripu Esaú.

18 Goãmũ dorerire Moiserẽ ĩgu apicũgue mari acawererã Israe masa mũra Goãmũ pohro ejaboro guhya árĩyoro. Dohpaguere mũapure eropa árĩbeaa. Őpa wayoro erãre. Goãmũ ĩgu dorerire Moiserẽ iri dorerire apigu erã árĩri yeba majagu utãgugue árĩpu. Irigupu Sinaii waĩcũdigũ árĩyoro. Eropiro erã Goãmũ pohro ejamorã irigugue erã ejacũ turaro peame ãjũyoro. Eropiro naitĩaro, imica curu, turaro miru sã árĩyoro irigu utãgure.

19-20 Erogue erã ejacũ corneta busũyoro. Eropiro wereniguiro cariyoro. Ĩgu eropa wereniguiiri ejaricũcũ peerã masa yujuro bojebiriñorã. Goãmũ erãre guhyaro mera õpa arĩ dorepu erãre: “Árĩpehrerã irigu utãgure pẽhrerãre utã mera dea wejẽque erãre. Irigu utãgure pẽhregũ waibũgu gohra ĩgu árĩquerecũ ĩgu sãre utã mera dea wejẽcãque. O ñoserimiji

mera ñose wejẽque ìgure,” arĩpũ Goãmũ. Ìgũ eroparĩcũ peerã yujuro bojebiriñorã erã.

²¹ Eropigũ árĩpehrerire utãgũguere gũhyaro árĩrĩre ìagũ õpa arĩpũ Moise: “Bũrigã gũigũ naragãgũ ìaa,” arĩpũ ìgũ.

²² Iribojegue Israe masa Goãmũ ìgũ árĩdigũ utãgũgue ejamasibiriñorã sĩriri arĩrã. Doh-paguere mũapũ Jesu yarãpũ Goãmũ árĩdigũ utãgũgue, Sión waĩcũdigũgue, umaro majagũgue mũrijaro dopa ta diaye ta Goãmũ mera wereniguimasia. Goãmũ ojocarigũ ìgũ ya macague mũrijaro dopa ta diaye ta ìgũ mera wereniguia mũa. Iri maca gaji maca mama maca Jerusalén umaro maja maca àhraa. Ero anyua bajarã gohra àhrima. Goãmũre umupeorã mucubiriri mera gamenererã àhrima.

²³ Eropirã mũapũ ìgũ ya maca majarã árĩrã, erogue Goãmũ porã árĩmũhtarã mera mũa gamenere árĩbodiropã dopa ta àhraa. Ìgũ porã erã waĩre ìgũ gojaturapũgue umarogue erã waĩre gojatunirã àhrima. Ìgũpũ mari Pagũpũ árĩpehrerã beyebu àhrimi. Ìgũ mera majarã àhraa mũapũ. Eropirã gajirã õarã Goãmũ yarã mera gamenererã dopa ta àhraa mũa sã. Erãre ta ñeri marirã iituhapũ Goãmũ.

²⁴ Eropirã Jesu mera majarã àhraa mũapũ. Negohraguere ìgũ dore apirare gohrotogũ “Mũare õaro iigũra yũhũ,” arĩ apipũ Goãmũ marire. Ìgũ eropa arĩ apidiropã dopa ta iidigũ árĩmi Jesu. Ìgũ dire cohã ìgũ sĩrirañe mera marire õaro taricũ iimi ìgũ. Abelre ìgũ di cóãrãre ìagũ Goãmũ Abelre wejẽdigũre dipuwaja moapũ. Jesucristo

ĭġu di cóãrapure ĭagũ marire dipuwaja marirã árĩcũ iipũ. Eropiro Abel ĭġu di cóãra bu gohra árĩya. Cristopũ ĭġu di cóãra pũhrũ õatariaro iipũ Goãmũ marire. Eropiro Cristo ĭġu di cóãra bu gohra árĩbiriya.

²⁵ Eropirã õaro iique mũa. Goãmũ yare mũare wereġure õaro yũhrirã árĩque. Iribojegue i yeba árĩdigũ Moise Goãmũ yare ĭġu werecũ peerã, bajarã irire peediabiriñorã. Erã eropa peediabirira dipuwaja, dipuwaja moapũ Goãmũ erãre. Erã tauro dipuwaja moagũcumĩ Cristore cóãrãre. Cristopũ umarogue árĩġũ Goãmũ yare wereġũ aħrimi.

²⁶ Irisubure Moisere ĭġu dorerire ĭġu apirasubure Goãmũ ĭġu wereniguiro mera yeba ñohmecũ iipũ. Dohpaguepure õpa weremi ĭġu: “I yeba ñohmecũ yujusubu ta iinemogũra. I yeba dihta ñohmecũ iisome yũhũ. Umarogue sãre ñohmecũ iigũra,” arĩ werepũ ĭġũ.

²⁷ “I yeba ñohmecũ yujusubu iinemogũra,” arĩġũ, “Árĩpehrerire yũ ĭħacũnugurare cóãġũra,” arĩġũ iipũ. Goãmũ ĭġu opũ árĩroguere cóãmasiya mara. Eropiro ĭġu ĭħacũnugurare ĭġu cóãcũ ĭġu opũ árĩro dihta dujaroca.

²⁸ ĭġu opũ árĩroque warãca mari. Eropirã ĭġu opũ árĩrore ĭġu cóãbiricũ ĭarã, Goãmũre “Õħaa,” arĩrã mari. Eropirã umupeori mera, ġũhyadiaro mera ĭġu yare iirã mari ĭġure mucubiricũ iimorã.

²⁹ Peame ũġaro ġũhyaro dopa ta Goãmũ ġũhyaro dipuwaja moagũ aħrimi. Eropirã ĭġure

gũhyadiaro mera umupeorã.

13

Õpa Goãtũre mucubiricã iique

¹ Mũa mera majarãre mahi duhubiricãque.

² Masa mũa masibirã árĩquerecũ erãre òaro mera mũa ya wirigue ñajaridoreque. Gajirã eropirã, masibiriquererã anyuare erã ya wirigue ñajaridoreñorã. Eropirã mũa sã eropa ta iique.

³ Peresu árĩrãre mojomoro ãaque. Mũapũ erã mera peresugue árĩrã mũa árĩboro dopa ta erãre mojomoro ãaque. Gajirã erã ñero tarirã sãre mojomoro ãaque. Erã iro dopa mũa sã ñero tariro dopa ta erãre mojomoro ãaque.

⁴ Mũa mojoto dirinirãre árĩpehrerã òaro game umupeoque mũa. Eropirã mojoto dirinirã gajirã mera ñero iirã árĩbiricãque. Árĩpehrerã uma nome mera ñero iinirãre, nome uma mera ñero iinirã sãre dipuwaja moagũcumĩ Goãmũ.

⁵ Niyerure gamerã ne árĩbiricãque. Õpa arĩpũ Goãmũ: “Mũare ne cóãsome. Eropa itamuniguigũra,” arĩpũ ãgũ. Eropirã mũa opari mera iripẽta mucubirique. Wũaro gamenemobiricãque.

⁶ Eropirã gũiro mariro òpa arĩ pepirãca marmera mũa ya wirigue ñajaridori:

Mari Opũ marire itamugũ àhrimi. Eropirã ne gũisome mari. Masa marire erã ñero iiborore gũisome mari, arĩ pepirãca mari.

⁷ Goãmũ yare mũare werenirãre mũare dorenirãre guãaque mũa. Eropirã òaro erã

árĩricurare guñaque. Eropa guñarã, Cristore erã umupeorare ñhacũque mũa.

⁸ Jesucristo ne gohrotobeami. Iribojegue, dohpague sãre, pũhrũgue sãre ñgu árĩdiro dopa ta árĩniguicãgucumi ñgu.

⁹ Baja buheri gajiropa árĩri buherire peebiricãque õari buherire guague cohãri arĩrã. “Ire baque. Ire babiricãque,” arĩ buhemaacãma gajirã. Eropa arĩrire mari yũhricũ iri marire itamubeaa. Eropiro eropa arĩ buherire mari iicũ bu gohra ta ãhraa. Iri marire guñaturarã árĩcũ iibeaa. Goãmũ marire guñaturacũ iimi.

¹⁰ Cristo mari ñeri dipuwajare sĩridi árĩmi mari ñerire cóãbu. Pahiapũ õpa arĩrã ãhrima: “Waibũgu yũ Goãmũre wejẽ soe mujucũ, Goãmũ mera tarigũca,” arĩrã iirima erã. Eropa arĩrã erã ñeri iirare ne cóãnrã árĩmasibeama.

¹¹ Pahia opũ Goãmũ ñgu árĩri tarĩbu gohrague waibũgu wejẽdigũ dire aĩ ñajagũ Goãmũre õpũ masa erã ñerire cóãdoregũ. Eropigũ ñgu wejẽdigũ waibũgure iri maca tũrogue soe cóãcãñorã.

¹² Eropa ta Jesu sã maca tũrogue sĩripũ. Ñgu di cóãri mera masa ñeri marirã wacũ iibu sĩripũ.

¹³ Maca tũrogue ñgu sĩricũ ñarã, erã buherire ñgu cóãcũ ñarã judio masa ñgure ñhaturĩnorã. Eropirã mari sã ñgu mera majarã árĩrã. Mari eropa árĩcũ ñarã masa mari sãre ñhaturirãcoma.

¹⁴ Erã marire ñhaturiquerecũ ãhraa. I yebague mari árĩwajaburi maca árĩbeaa. Mari pũhrũgue árĩburi macare corerã iiaa mari.

¹⁵ Eropirã Jesu ñgu itamuro mera ñgu Pagũ mera wereniguia mari. Eropirã ñgure õaro

serēniguicārã. “Mari Pagu turagu āhrimi,” arĩ umupeoniguirã gajirãre wererã. Mari eropa arĩ werecũ ĩgu mucubirigucumi.

¹⁶ Mũa mera majarãre ðaro iique. Mũa oparire gajirã sãre oque. Irire cãdijibiricãque. Mũa eropa ðaro iirã Goãmure umupeorã iica. Eropa iirã ĩgure mucubiricũ iirãca.

¹⁷ Mũa oparãre ðaro yuhrique. Erã dorero dopa ta yuhrique. Goãmũ mũare ĩhadibu buhedoregu apimi erã oparãre. ĩgu eropa apinirã arĩrã eropa mũare ĩhadibuniguirã iima Goãmure tarinugadiabirã. Eropirã erãre ðaro yuhrique mũa erã mucubiriri mera mũare itamuboro dopa ta. Mũa yuhribiricũ ĩarã erã bujawererãcoma. Eropa yuhribirã ðaro arĩsome mũa.

¹⁸ Guare serēbasaniguque Goãmure. Umuri nũcũ ðari dihtare iidiaa gua. Eropirã “Ñerire iirã iiaa,” arĩ pepibea gua.

¹⁹ I tamerare turaro serēbasaque Goãmure yure: Yojaro mera yũ mũa pohrogue wamasiborore serēque Goãmure.

Ipũ gojabeodigu ðadoretupũ

²⁰ Goãmũ marire ðaro arĩcũ iigu āhrimi. ĩgu mari Opũ Jesucristo sĩridigure masupũ. ĩgu “Mũare ðaro iigura,” marire arĩ apidigu āhrimi. ĩgu eropa arĩrare iinijagu Jesupũ marire taugu āhrimi. Mari ñeri dipuwajare ĩgu di cohã sĩripũ ĩgu. Eropigu ĩgu turagu, ovejare ĩhadibugũ iro dopa arĩgu, marire ĩgu yarãre ðaro ĩhadibumi.

²¹ Eropigu Goãmũ ĩgure masudigu mũa sãre itamuporo arĩpehreri ĩgu gamerire mũa iiboro

dopa. Eropigu Jesucristo ïgu itamuri mera Goãmũ ïgu gamero dopa ta árïpehrerã marire õarire gohrotocũ iiporo. Eropirã árïpehrerinũri Cristore umupeorã. Eropa ta iirã.

²² Yũ acawererã, ire turaro mũare doregura: Ipiũ mũare yũ wererare õaro mera peeque mũa. I yũ mũare gojabeoripũ wuaripũ árïbeaa. Eropirã ire õaro peeque.

²³ I sãre mũare weregura: Mari acaweregure Timoteore peresu árïdigure wiuañorã. Doh-pagohragã ïgu aricũ yũhũ ïgu mera mũare ïagu wagura.

²⁴ Mũa oparãre, árïpehrerã gajirãre Goãmũ yarãre ero árïrãre õadorema. Italia majarã Jesu yarã sã mũare õadorema.

²⁵ Árïpehreri mera Goãmũ mũare õaro iiporo. Eropa ta iiporo. Iripëta ãhraa.

Desano

Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

17771afc-c309-57fd-9ff3-2d5a0cd59ff1